

Mekbê idjaer kute amikajmã'ã Jeju mar nhõ pi'ôk no'ôk ne ja.

Me'õ ne Jeju'ã pi'ôk no'ôk ne kam mekbê idjaer kute amikajmã'ã Jeju markumrêx jamã ano, ar kute mrãmri Jeju'ã ngràkumrêxmã. Mekbê idjaer kwỳ ne ar amikajmã'ã Jeju man kam arỳm kute ari mỳjjakôt akêxmã. Nãm ar abenmã,

—Gwaj akubyn Mõjdjê kukràdjà tùmjakôt amijo baba.

Ne ajte,

—Gwaj akubyn Metĩndjwỳnhmã mry bõn kamrô kapĩ. Birãm Jeju kamrô me bajaxweo bingrành mànhkutã kêt, gwaj akubyn mry kamrôdjwỳ me bajaxwe pãnh ajte Metĩndjwỳnhmã kungã ane. Kam ne me'õ arkum pi'ôk no'ôk ne arkum,

—Kati, Jeju pydji kute me bajaxweo bingrành djwỳnh. Kwãrĩk wãnh atemã ibej mỳjja 'õ jabej kêt. Jeju kamrô pydji ne me bajaxwe mànhkutã. Kwãrĩk wãnh Jeju kamrô nhibej mry kamrô nhõr kêt, ane. Nãm ã anen kam arkum Jeju mex jarẽ. Jejubê ne Metĩndjwỳnh kra. Jeju ne mỳjja kunĩ kuràm mexkumrêx. Ne kadjy mrãnh djwỳnh kuràm raxi. Ne Mõjdjê kuràm raxi. Ne me kute me kadjy Metĩndjwỳnh mar djwỳnhja kuràm raxi. Jeju kamrô ne mry kamrô kuràm mexkumrêx ne kam kute o me axweo bingrành kadjy mexkumrêx. Nhyem Jeju kukràdjà nyja ne Mõjdjê kukràdjà tùm jakàjbê bõx ne kuràm mexkumrêx. Kam gêdja me mrãmri Jeju'ã ngràkumrêx ne mã 'amỳn kanga kêtikumrêx ne mã kôt ajkamẽn õ pykakam bõx, kàjkwakam õ pykakam bõx.

Metĩndjwỳnh kra kute raxo kadjy mrãnh djwỳnh jakrenh.

Kor 1.15

¹ Amrêbê ne Metĩndjwỳnh me bakukãmãremã kabên. Me kute kabên jarênh djwỳnhkôt ne memã kabên, ne apỳnh mỳjja djàri kôt memã amijo amirĩto tẽ. Nãm memã kabên tẽm tãmtã ĩ amũ kamingrãnymã kabên ba. ² Nhy m bep ajbir ne Krakôtbit me bamã kabên ne. Ajbir ne akati kute o ino rerkambit Krakôt me bamã kabên ne me bamã amijo amirĩt ne.

Bir be, arỳm kute Kramã mỳjja kunĩ kangaja pumũ. Nhy m kam Kra arỳm pykamẽ kàjkwamẽ mỳjja kunĩ 'y. Metĩndjwỳnh djô'ã ne mỳjja kunĩ 'y. ³ Nãm Metĩndjwỳnh jadjêho adjênh ne. Kubê Metĩndjwỳnh tãm. Ar kute aben pyræk. Nãm 'ityxkumrêx ne kam ta amikabênkôt mỳjja pumũnh 'ãno dja. Kute mỳjja kunĩ nhipêxja pumũnh 'ãno dja. Djãm kabên ngri got. Nãm ta amikabên pymao mỳjja kunĩ pytàn 'ãno djan ar o ba.

Bir be, tãwã ne me babê me bajaxweo pòx ne me bajo mex ne kam arỳm mã tẽ, mã kàjkwamã tẽn kam nhỹ, Metĩndjwỳnh djubôk'ãnh nhỹ. Metĩndjwỳnh kubê kumkati djubôk'ãnh nhỹ. Djãm me kàtàm ne me me bẽnjadjwỳr rũnh djubôk'ãnh krĩ? Kati, ãm me bẽnjadjwỳr rũnhbit. Me bẽnjadjwỳr rũnh ne me me ubôk'ãnh krĩ.

⁴ Nã, kra ne ra:xi. Raxo kute kadjy mrãnh djwỳnh jakrenh mexi. Ne umaodjwỳ kute kadjy mrãnh djwỳnh jakrenh. Bãm ne 'ã bẽnjadjwỳr mẽ nhy m uma: ne. ⁵ Nhỹnh ne Metĩndjwỳnh kadjy mrãnh djwỳnh 'ômã kum, “Mrãmri abê ikrakumrêx. Jakam ne ba arỳm ajo ikrakumrêx ga amipãnh ijo Abãmkumrêx”, ane got.

Kati, kramãbit ne ã kabên ane. Nàr kon, nhỹnh ne Metĩndjwỳnh kadjy mrãnh djwỳnh 'ô'ã memã kum,

“Dja ba o ikra nhym ijo Bãm”, ane got.

Kati, Kra'ābit ne ā kabēn ane. ⁶ Ne kam ajte, kute pykamã kra janorkam memã kum,

“Gora gē ikadjy mrānh djwýnh kunĩ ikramã rax jarē”, ane. Be, kubê Metĩndjwýnh krakam arým kum mýjja kunĩ re nhym rax ne.

⁷ Nhym bep kadjy mrānh djwýnh'ābit ne,

“Nã bãm amikadjy mrānh djwýnh nhipêx nhym kute kôkmē kuwy pyrāk.

Akrānmã imã mrānh ne ikadjy àpēnhmã”, ane.

⁸⁻⁹ Nhym bep Kramābit ne kum,

“Be, Metĩndjwýnh, mrāmri dja ga meo aba rã'ã rã'ã ne.

Nã gãm katāt meo aban amã mýjja mexbit kĩnh ne katāt amijo aba ne amã mýjja punu kurê.

Kam ne ba ibê anhō Metĩndjwýnh ne amijo apytàn arax kadjy adja. Ga kam akĩnhkumrêx ne. Nã gãm araxmē akĩho anhōbikwa kunĩ jakrenh mex ne”, ane.

Nãm ã Kramã ane ne kam ajte kum,

¹⁰ “Ga, Bēnjadjwýr, ga ne ga krax kurũm pyka nhipêx ne anhikrao kãjkwa nhipêx.

¹¹⁻¹² Dja ĩ apêx. Nhym bep kati, gajbit dja ga arã'ã: rã'ã rã'ã.

Nhym bep kati, dja ĩ kute kubêkà pyrāk ne tũm ne.

Mrāmri ne me kute kubêkà, mýjja tũm, inôkà tũm nhym me kute krān o mrānh ne 'ê'ã rēnhja pyrāk. Dja ga ĩ ã kãjkwamē pyka tũm krān o atēm ne mēnhō ane. Ne kam arým pānh ny nhō.

Nhym bep ga dja ga tũmrām arã'ã rã'ã ne. Ga adjwýnh tãmo dja ga amũ arã'ã: rã'ã ne. Dja ga atemã kêtumrêx”, ane.

Bir be, nãm ã Kramã ane.

¹³ Nhýnh got kadjy mrānh djwýnh 'ômã kum,

“Amrê idjubôk'ãnh nhỹ, abênjadjwyr raxkam idjubôk'ãnh nhỹ.

Ikutêp nhỹ ba 'yr amrê awyr akurê djwýnho mō ga kwý o apardjan kwý nhimex”, ane.

Djãm kute kadjy mrãnh djwýnhmã ã anhỹr got? Arkati, Kramãbit ne ã kabên ane. ¹⁴ Nhy m bep kadjy mrãnh djwýnh ne Metĩndjwýnh nhõ àpênh kajgo. Djãm mebêngôkre got* amirĩt ne? Kati, me kute noo omũnh kêt nhy m Metĩndjwýnh me bakadjy ano. Me ba ba, Metĩndjwýnh kute me bapytàr ne kute ar me bajo bamã, me bawyr ne anoro dja, kute me bapumũnh ne kute me bajãno ãmmã ne me bawyr ano.

2

Me kute Metĩndjwýnh kabên mar 'ãno ãmmã.

¹ Bir be, kam, Metĩndjwýnh kute me bamã krabê kumkati janorkam dja gwaj tu amijamakkrekam nhôrkumrêx. Me kute gwaj bamã katàt arênh gwaj baje marja tãm dja gwaj tu amijamakkrekam nhôrkumrêx ne 'amýnh tỳx, gwaj baje o babiknor karõ. Dja gwaj ate ar bakrãn baban kam ĩ o babiknor mex ne, o babiknor mexo tẽ.

² Amrêbê ne kadjy mrãnh djwýnh memã Môjdjê kukràdjà jarẽ, me kute kôt amijo bamã. Nhy m me'õ kôt kute amijo ba kêt nàr kon kubê binhirênh katã nhy m kam arým kum o pãnh ne. Katàt kum o pãnh ne. ³ Bir be, dja gwaj badjwý ate bakrãn ar baba djãm kute gwaj bamã o pãnh kêt mã? E kum kati, gêdja gwaj bamãdjwý o pãnh ne. Amrêbê ne Metĩndjwýnh memã kukràdjàbit jarẽ. Nhy m me ate krãn ar ba nhy m arým memã o pãnh ne. Nhy m bep

* ^{1:14} Apỹnh me õ pyka djàri kunĩkôt ne me kunĩ bêngôkre. Kubêkà jakamẽ me kakrãtykmẽ me babêngôkremẽ ne me kunĩ: bêngôkre.

ajbir, ajbir ne me bamã kra ngã, krabê me bapytàr djwýnh me bamã kungã. Djãm ate gwaj bakràjamã kute o pãnh kêt mã? E kum kati ne. Dja gwaj bamãdjwý o pãnh ne. Bënjadjwýr ta ne kumrêx memã amijarê, kute me utãrmã amijarê. Nhy m kam kute ar meo baja, me kôt baja ne me kuman kam ô'ã gwaj bamã kôt arê, kabêno kabên ne gwaj bamã arê.

⁴ Nhy m Metĩndjwýnhdjwý kôt mýjja kwýo amirít, me kute kôt kum kator kadjy ne umao apôx ne o mýjja 'yro ba, apýnh mýjja pumũnh kêt 'yro ba, me kôt baja ne me uma proo mýjja 'yro ba. Nãm me me akrymê me kanêo mex, me tyk kwýo tĩn, bõm me nêje me karõ rê, ã ar meo anhýro ba. Nhy m kam Metĩndjwýnh ajte kôt memã ta Karõ jano, apýnh àpênh djãri ne kadjy tu ukabikôt memã kungrà. Nãm ã Metĩndjwýnh kute meo bao ane, me kute Jejumã kator kadjy.

Jeju amijo kubêngôkren kute me bapyràk.

⁵ Djãm kadjy mrãnh djwýnh Metĩndjwýnh kute amim umjýr got? Kute ar pykao ba kadjy, kute amim umjýr got? Ije ar amã pyka ny jarênhja tãm, djãm kute ar o bamã? Kati, Jejubit ne kute ar pykao ba kadjy Metĩndjwýnh amim kudja. Kute mýjja kunĩo ba kadjy ne amim kudja. ⁶ 'Ã ne me'õ Metĩndjwýnh kabênkam,

"Ë, Metĩndjwýnh, djãm me ibêngôkre imex got ga aje me imar rã'ãmã? Mýkam ne ga me ikakritjao djuw mex ne?

⁷ Nã gãm o kàtàm, akadjy mrãnh djwýnh kôpdji'ã o kàtàm. O kàtàm 'iry kêt ga ajte umamê raxo utà ⁸ nhy m ajte mrãmri bënjadjwýr rax ne mýjja kunĩo ba", ane.

Nãm ã Metĩndjwýnh kabênkam ane. Ga kute mýjja kunĩo baja pumũ. Nhýnh ne mýjja'õ kubê 'ã kàtàm ne? Kati.

Djãm me babêngôkre'ã ne kabënja? E kum kati, Jeju'ã ne ã ane. Mebêngôkre kute mỳjja kunĩ ba kêtja pumũ.

⁹ Nhyim bep Jeju'ã ne ã ane. Mrãmri ne kadjy mrãnh djwỳnh kuràm kàtàm 'ikrãn mex ne, nhyim Metĩndjwỳnh ajte 'ã raxmẽ umamẽ kumẽ. Nãm me bapãnh ty nhyim kam pãnh Metĩndjwỳnh 'ã kute raxmẽ umamẽ mẽnho ane. Metĩndjwỳnh me bakam ukaprĩ kôt ne amim kra'ã karõ nhyim kam me bapãnh ty, me bakunĩ pãnh ty. Djã nãm tyk kadjy tokry kêt ne ty? Kati, nãm tyk kadjy tokry: ne. Nhyim kam pãnh Bãmja 'ã umamẽ ra:xmẽ kumẽ.

¹⁰ Djãm Metĩndjwỳnh kute kra tokry'ã amim karõja punu got? Kati, mrãmri katàt. Metĩndjwỳnh kute mỳjja kunĩ 'yr ne kute ar o baja tãm ne krabê Jeju'ã amim karõ, kute tokry maro tẽm ne inomã mẽnho ne kam mrãmri kubê me bapytâr djwỳnhkumrẽxmã. Tokrykõtbit ne me bapytã. O ne Metĩndjwỳnh me bakrãptĩ pytàn me bajo kra, kute õ kàjkwa mextiremã me bajo tẽm gu me kramẽ baro'ã arkam babamã. Jeju ne me bamã wan me bamã pryõ mõn kàjkwamã wadjã. Dja gu me ĩ kôt pry'a mõn wadjã.

¹¹ Bir be, ta Bãm ne kubê me Babãm pydji. Ta, kute me bajo mex ar o bajamẽ gu me bamẽ ne gu meo Babãm pydji. Kam ne me bajo kamy. Me bakam pijàm kêt ne tu me bajo kamy. ¹² Nãm Bãmmã kum,

“Dja ba ikamyremẽ ikanikwỳnhremã ajo amirĩt.

Me kute aben pydji nhipôkri dja ba memã amex jarẽ”, ane.

¹³ Ne kam ajte,

“Metĩndjwỳnh kanàrràm dja ba ar amijo iba”, ane.

Ne kam ajte,

“Ota ba dja. Metĩndjwỳnh kute imã ikra nhõrjamẽ ro'ã ne bar dja”, ane.

Nãm ã Jeju gwaj bajo õbikwao ane. ¹⁴ Bir be, Metĩndjwỳnh krabê ne gu me babaja. Ga me banhĩa pumũ. Me barerek,

me bakatyk, me bakanê, me batokryja pumũ. Kam ne Jeju amijo kubêngôkren* kute me bapyràkà. Ne kam amitykkôt Xatanajo ajkê. Xatanaj kute memã tyk jarênh nhym me kabênkôt tykja tãm ne prïne o ajkê. Kadjy ne amijo kubêngôkren ty.

¹⁵ Ta amitykkôt Xatanajo ajkên kubê me bakaba. Nã gu me bamã batyk pyma: ne. Me batĩnri bamã batyk pyma: ne. Nhym kam Jeju ne me bakadjy tyn kam o me bamã me batyk pymajao ajngrà, gu me arỳm bamã uma kêt ne.

¹⁶ Djã nãm amijo kadjy mrãnh djwỳnh ne ruw ne me utà? Kati, nãm amijo kubêngôkren ruw. Nãm amijo Abraão tàmdjwỳ 'òn ruwn me utà.

¹⁷ Kam ne me bajo kamykumrêx ne kam kamymê kute aben pyràk. Nãm me banhõ ì, ne kam me bakôt tokry, me bakôt mỳjja maro ba, me bakôt muw, me bakôt kĩnh. Bir be, nãm prïne kute kamy bêngôkre pyràk, kute me bapyràk ne kam arỳm kubê Metĩndjwỳnh mar djwỳnh nhõ bēnjadjwỳr rax djukaprikumrêx ne Metĩndjwỳnhmã àpēnhkumrêx ar ban kute kanga kêt. Nãm me bakadjy Metĩndjwỳnhmã amijarê, me bajaxwe pãnh tyk jarê, nhym arỳm me bajaxweo ajngràn me bajaxweo akno.

¹⁸ Djãm me banhõ Metĩndjwỳnh mar djwỳnh nhõ bēnjadjwỳr kute gwaj bamar kêt, kute gwaj batokry mar kêt? Kati, kute gwaj bamar. Xatanaj kute gwaj bajo baja mar. Djãm kute adjwỳnhdjwỳmã mỳjja jarênh kêt, axwe'ã àpnēnh kêt. Pykabê ar baridjwỳ ne kum axwe'ã apnē nhym adjwỳnhdjwỳ tokry: ne. Kute tokrydjwỳ mar. Kute

* ^{2:14} Kritu ne amijo kubêngôkre kute mrãmri ne apỳnh me õ pyka djari kunĩkôt me kunĩ: bêngôkreja pyràk. Kubê kà jakamê me kakrãtykmê me babêngôkremê ne me kunĩ: bêngôkre. Me kamrômê me kukràdjà kunĩ kubêngôkreo aben pyràk. Jakam dja ga Karõ 17.26 jarēn ama.

mỳjja kunĩ mar. Kam dja gwaj bakam ukapri: ne gwaj bawỳr prõt ne kubê gwaj bapytà. Xatanaj kute gwaj bamã axwe'ã àpnênhkam dja gwaj bawỳr prõt ne kubê gwaj bapytà.

3

Jeju kute raxo Môjdjê jakrenh.

¹ Nà, akmere ar, àpnhĩre ar, ar abê Metĩndjwỳnh nhõ me mextireja, Metĩndjwỳnh kute kàjkwa kadjy gwaj baro'ã amijo gwaj bapytàr, on ar Jejukõt ajamak bèn. Ê, dja ba ar amã Jeju rax jarê. Arym ne Metĩndjwỳnh me bawỳr Krabê Jeju jano, me bakadjy ano nhym bõx. Ne kam mrãmri ne kubê me banhõ Metĩndjwỳnh mar djwỳnh nhõ bènjadjwỳr rax. Tãm ne gwaj tu amim kamnhĩxkumrêx ne kam memã arênh ar o baba. ² Nhym kam Jeju bõx ne kum àpênhkumrêx ar ba. Metĩndjwỳnh kute anorjamã àpênh ar ba ne kanga kêtumrêx. Kute Môjdjê pyrak. Môjdjêdjwỳ ne prĩne kute anor djwỳnhjamã àpênh ar ba ne Metĩndjwỳnh nhõ me jao ban meo djuw mexkumrêx ne kute me kanga kêtumrêx.

³ Nhym bep Jeju ne Môjdjê kuràm rax ne. Kam dja me mã abenmã Jeju pymamê rax jarênh ar o ba. Ga me kute amim kikreja pumũ. Kikre nhipêx djwỳnh ne raxo, tỳxo kikre jakre. Nãm ã Jeju kute kikre nhipêx ar o ba prãbê Môjdjê nhipêxo ane ne kam raxo Môjdjê jakrenh mex ne. ⁴ Nhỹnh ne kikre 'õ ta kute aminhipêx got? Kati, kikre 'yr djwỳnh ta ne ikrao kikre 'y. Bir be, nãm ã Metĩndjwỳnh mỳjja kunĩ 'yro ane. Nà, mỳjja kunĩ nhipêx djwỳnhbê ne Metĩndjwỳnh. Ta ne Môjdjêdjwỳ nhipêx ne.

⁵ Mrãmri ne Môjdjê prĩne Metĩndjwỳnh nhõ me ja kunõ ban meo djuw mexkumrêx ne kute me kanga kêt ne memã Metĩndjwỳnh kute amũ tũmràm amikukràdjào

amirĩtja kajmã'ã memã arênho ba. Kubê Metĩndjwỳnh nhõ àpênh. Õ àpênh kajgo.

⁶ Nhyim bep Kritu kubê Metĩndjwỳnh kra. Kubê Metĩndjwỳnh kra ne ta õ me jao ban prĩne meo djuw mexo ban kute me kanga kêt kumrêx. Ê, gwaj ba ne gwaj babê ta õ me ja. Nhyim Metĩndjwỳnh arỳm gwaj bamã mỳjja mex dji. Gwaj batĩn prãm kêt ne baje amim kamnhĩxbê mỳjja mexja kam amak ne kam bakĩnh rã'ã jabejmã. Dja gwaj o anhỹro bamõr ne inomã mênh jabej babê ta õ me ja.

Me amakkre kêt ne ar ba nêje memã kabên.

Kô k 10.1; Djuda 5

- ⁷⁻⁸ Kam ne Metĩndjwỳnh Karõ memã kum,
 “On me akati jakam on aje Metĩndjwỳnh kabên mar jabej gê on wãm ajamakkre kêt on wãm nõ.
 Amrêbê ne me akukãmãre amakkre kêt kumrêx ne kapõt kukritkam jãm Metĩndjwỳnho akêx ne 'ã kabên ne.
 Me kute ngyrk jabejmã ne me,
 ‘Kati, Metĩndjwỳnh dja me bajo bikênh kêt. Dja gu me te kam amikrà ar o baba nhyim me bajo bikênh kêt.
 Kute me bajo krakam dja tu ate krã’, ã ar anhỹr ba.
 Nãm me ã me kute Metĩndjwỳnh ngyrk jabejmã ã ane.”
 Nãm ã Metĩndjwỳnh ane ne kam ajte memã kum,
⁹ “Nã, wãnh ne me akukãmãre kute amim ikakinhmã, kute ingyrk jabejmã ar ikam amikrà:o ba. Nã bãm te me nokam memã mỳjja kwỳo amirĩt ar o iba nhyim me ãm ate kute we ingyrk jabejmã ar we ã anhỹr ba.
 Me kute we ingyrk jabejmã 'ã amexbê 40.
¹⁰ Kam ne ba me jakam ingyry:ky ne memã kum,
 ‘Mrãmri ne me ja ajte ikam amikràn ibê binhirênh mō. Ne ikabên mar prãm kêt kumrêx’, ane.
¹¹ Kam ne ba ingyry:ky ne mrãmri ikabên pydjĩn arê. Nã bãm memã kum,

‘Aj, me ja dja me inhõ pyka'yr bõx kêtikumrêx ne ikõt me tyk djà kêt djakam tyk djà kêt kêtikumrêx’, ane.”

Nãm ã Metĩndjwỳnh kabẽn ane.

¹² Ë, akmere ar, àpnhĩre ar, kam ne ba ar amã, gora ar amijãno dja. Ar akadjwỳnhbê ajaxwe 'õ, apunu 'õ ar akam kator ga kam arỳm ar aje amim Jeju kamnhĩx kêt ne aje Metĩndjwỳnh tĩnja kanga karõ dja gar mrãmri amijãno dja. ¹³ Kwãrik wãnh gar amikam ajamak kêt kati kêt. Dja gar akati kunĩkõt abenmã akabẽn ne o abenmã tỳx jadjà. On akati jakam, Metĩndjwỳnh kute ar amã,

—On jakam, anhỳr ja ma. Metĩndjwỳnh kute me amakkre kêtõ tỳm kêttri. Gêdja mỳjja punu 'êxri kute mex pyræk ne arỳm ar anoo akno. Kute ar anoo biknor gar ajamakkre kêt karõ dja gar on abenmã tỳx jadjà.

¹⁴ Gwaj bakunĩ baro'ã babê Kritu nhõ me ja dja gwaj 'ã bangrà tỳx. Amrêbê gwaj baje amim kamnhĩx nyrekam batỳxja dja gwaj o batêm rã'ã o tẽn o tẽn o tẽn inomã kumê. Gwaj gop mrãmri ã o anhỳr jabej kam arỳm babê Metĩndjwỳnh nhõ me jakumrêx.

¹⁵ Bir be, on dja gar ã amijo ane. Ga Metĩndjwỳnh Kabẽn kute,

“On me akati jakam on aje Metĩndjwỳnh kabẽn mar jabej gê on wãm ajamakkre kêt on wãm nõ.

Amrêbê ne me akukãmãre amakkre kêtikumrêx ne kapõt kukritkam jãm Metĩndjwỳnho akêx ne 'ã kabẽn ne”, anhỳrja pumũ.

¹⁶ Nhỳnh me ja ne me Metĩndjwỳnh kabẽn mar kajgon kam jãm o akêx ne? Je kum Mõjdjê kute pykabê Edjitu kurũm meo kator ne kute meo baja kunĩ, me tãm.

¹⁷ Nhym nhỳnh me ja ne Metĩndjwỳnh mekam ngryk ne? Mekam ngryko têm rã'ã'ã amex krãptĩbê 40? Je kum, me tãm, me kute Metĩndjwỳnhkam amikràõ ba ne kam

wānh kapôt kukritkam apÿnh rôrôk ban wānh tyko ikwā, me tām.

¹⁸ Nhyh nhÿnh me ja'ã ne Metĩndjwÿnh memã kabĕn pydjĭn arĕ ne memã kum,

“Aj, me ja dja me inhō pyka'ÿr bōx kĕtkumrĕx ne ikôt me tyk djà kĕt djàkam tyk djà kĕt kĕtkumrĕx”, ane.

E kum me tām, me kute Metĩndjwÿnh kabĕn mar kĕt ne ar baja, me'ã ne ane. ¹⁹ Bir be, ga me kute amim Metĩndjwÿnh mar prām kĕtkam 'ÿr bōx kĕtja pumū.

4

Metĩndjwÿnh memã me tyk djà kĕt djà jarĕ.

¹ Ē, gwaj amijāno dja. Gwaj bajō 'ÿr babōx kĕt karō dja gwaj amijāno dja. Metĩndjwÿnh kute ō pyka'ÿr memã kràn kute memã tyk djà kĕt djà jarĕnhja tām ne gwaj bamã nōr rā'ãã. Kam dja gwaj amijāno dja, gwaj bajō 'ÿr babōx kĕt karō. ² Ē, 'ã ujarĕnhja, 'ã ujarĕnh mexkumrĕxja ne arÿm gwaj bawÿrdjwÿ bōx, gwaj arÿm me kudjwa kuma. Me bakukāmāre kumrĕx 'ÿr bōx nhyh me kuma. Nām me mar kajgokumrĕx ne. Djā nām me kuman amikajmã'ã tu kamnhĭxkumrĕx? Kati, nām me ām mar kajgon ate krā.

³ Nhyh bep gwaj ba ne gwaj baje tu amim markumrĕx ne baje amijā kamnhĭxkumrĕxja, gwaj ba dja gwaj 'ÿr babōxkumrĕx ne kam kam batyk djà kĕt ne. Nhyh bep me amakkre kĕt'ã ne Metĩndjwÿnh memã kum,

“Nā bām ingy:k ne mrāmri ikabĕn pydjĭn arĕn memã kum,

'Aj, me kute ikabĕn mar kĕtja dja me inhō pyka'ÿr bōx kĕtkumrĕx ne ikôt me tyk djà kĕt djàkam tyk djà kĕt kĕtkumrĕx', ane.”

Djām kam me tyk djà kĕt djà kĕt got me 'ÿr bōx kĕtmã. Je kum amrĕbĕ ne Metĩndjwÿnh pyka nhĭpĕxo tĕn inomã kumĕn kam me kukām tyk djà kĕtmo krax ne te memã

tyk djà kêt djà jarēn te mekam ama. ⁴ Be, Metīndjwŷnh kabēnkam ne pi'òk ràràr'ã memã,

“Nãm pi'òk tyk to ino rerkam àpēho ino ren kam pi'òk ràràrkam tyk djà kêtò nō”, ane.

⁵ Ne kam ajte me tyk djà kêt djà jarē, ne,

“Aj, me ja dja me inhō pyka'ÿr bōx kêt kumrēx ne ikôt me tyk djà kêt djàkam tyk djà kêt kêt kumrēx”, ane.

⁶ Me bakukãmāre kumrēx kute 'ã ujarēnh mar kajgoja me tãm ne me 'ÿr bōx kêt kumrēx, me kute amim Metīndjwŷnh mar kêt kam. Tãm, me tyk djà kêt djà, ne arek me ja kadjy nōr rã'ã, atemã me ja kadjy nōr rã'ã.

⁷ Kam ne Metīndjwŷnh ajte akati 'õ jarē ne memã,

“Akati jakam on ajamakkre kêt wã on wãm nō ga me ikabēn man kam ikôt atyk djà kêt djà'ÿr bōx.”

Nãm amũ tũmràm Dawimã kabēn nhym ô'ã memã arē, ajbir ije me amã arēnhja tãm, ne memã,

“On me akati jakam on ajte Metīndjwŷnh kabēn mar jabej gē on wãm me ajamakkre kêt on wãm nō”, ane.

⁸ Bir be, nãm ren Djodjuwe ren me tyk djà kêt djà'ÿr meo bōx nhym ren Metīndjwŷnh ren ajte tũmràm akati 'õ jarēnh kêt kumrēx, me tyk djà kêt djà kadjy akati 'õ jarēnh kêt kumrēx.

⁹ Nhym bep kati, 'ÿr kute meo bōx kêt kam memã nōr rã'ã. Metīndjwŷnh nhō me ja kadjy, kadjy ne nōr rã'ãã, gwaj bamã nōr rã'ãã. Kute pi'òk ràràrkam Metīndjwŷnh kôkam kôto nōr ja pyrək. Dja gwaj ã kudjwao ane.

¹⁰ Kôt dja gwaj badjapēnh jakàn kam Metīndjwŷnh kudjwa bakôkam kôto banhikwã. ¹¹ Ajrã, gora gwaj batÿx ne kudjwa 'ÿr bōx ne kudjwa bakôkam kôto nō. Gwaj bajō baje me bakukãmāre'ã amijakren bajamakkre kêt ne arík ar baban 'ÿr babōx kêt karō ne ba ar amã,

—Gora gwaj batÿx ne kudjwa 'ÿr bōx, ane.

¹² Djãm Metĩndjwỳnh kabẽn kajgo got. Kabẽn kute mỳjja tĩn ne àdjõnh pyræk. Dji tĩnkêt. Dji kute mỳjja kyxkêt. Ga mrãmri me kute kàx aktã irékõt prĩne wa ngrành nhym kute mỳjja kyx tỳxja pumũ.

Nãm ã Metĩndjwỳnh kabẽn kute kàx pyræk ne wa mexo kàx jakrenh mexo ane. Mrãmri me kute kàx djwa mexo mrymã ukabêr ne kute o mry toprik ne kute amũ katàt o 'i jakàr nhym kre kamrêk ne ikwã nhym 'i kanhĩnja amirĩt mex ne ikwãja pyræk.

Nãm ã Metĩndjwỳnh kàx'ã amikabẽn jakreo ane ne kabẽno ã gwaj bajo ane. Nãm ta kabẽno gwaj bakadjwỳnhbê prõt ne gwaj badjumar djà'ã kurên gwaj bakamũnho ane. Ne kam gwaj banhõkre kadjwỳnhbê baje amim mỳjja'ã karõja, baje mỳjja mar ar o babajao amirĩt ne mỳjja kabi. Gwaj Metĩndjwỳnh kabẽn mar ar o baba nhym Metĩndjwỳnh gwaj badjumar djàkam gwaj bamã kabẽn ne,

—Mexkumrêx, ikabẽnkõt ne ga amijo aba, ane.

Nàr kon,

—Ë, nã gãm aje ikabẽnkõt amijo aba kêt, ane.

Nãm ã Metĩndjwỳnh Kabẽn kute kàx pyræk ne gwaj bakadjwỳnhbê: prõto ane. ¹³ Bir be, nhỹnh ne mỳjja 'õ Metĩndjwỳnhbê apdju? Arkati, kute mỳjja nhipêx kunĩ ne amirĩtkumrêx ne nõ. Irãri kum nõ. Noo kute mỳjja kunĩ pytàr. Kumã dja gu me amijarê, kubê mỳjja 'õ biknor kêtikumrêx.

Metĩndjwỳnh mar djwỳnh nhõ bẽnjadjwỳr rax'ã ujarênh.

¹⁴ Ije ar amã arênh ja ma. Ije õbê ar amã Jeju rax'ã idjujarênhja dja ba akubyn ar amã arê. Gora gwaj baje amim Jeju mar ne 'ã ar memã badjujarênh babaja gora gwaj 'ã bangrà tỳx. Ga gwaj banhõ Metĩndjwỳnh mar djwỳnh nhõ bẽnjadjwỳr ra:xja pumũ. Nãm kàjkwamã

wadjàn amũ kajônkhôt katon kam ýtã Metĩndjwýnh'ýr bôx. Kubê ne Jeju. Kubê ne Metĩndjwýnh kra.

¹⁵ Gwaj banhõ Metĩndjwýnh mar djwýnh nhõ bēnjadjwýr rax djukaprĩkumrēx. Djãm kute gwaj barerek mar kêt got? Kati, nãm te Xatanaj axwe'ã kum apnê nhym ãm tu ate krã. Gwaj apýnh bajaxwe djari kute 'ã gwaj bamã àpnēnh, 'ã ne kum apnê nhym ãm tu ate krãn axwe kētkumrēx ne.

¹⁶ Bir be, gora gwaj amikam bapijàm kêt ne tu Metĩndjwýnhmã amijarē. Ôdjãnhkumrēx gwaj kam tu kum amijarē. Dja gwaj bakam ukaprĩkumrēx. Gēdja mýjja kute ar gwaj bajo baja, gwaj bajaxwe, gwaj barerek, gwaj bakaprĩ, gwaj batĩn prãm kute ar gwaj bajo baja, kam dja gwaj tu bapijàm kêt ne Metĩndjwýnhmã amijã ajarē nhym kam ta ukaprĩkôt prĩne gwaj bajo djuw mexkumrēx ne.

5

¹ Ę, Metĩndjwýnh kute amim me kadjy Metĩndjwýnh mar djwýnh nhõ bēnjadjwýr rax, bēnjadjwýr bēngôkre 'õ* djarmãja pumũ. Kute amim 'õ djar kadjy ne amijo me bajõ, me babēngôkre 'õ pytàn amim kudja, nhym kam ta, me kadjy Metĩndjwýnh mar djwýnh ta ne me ô'ã Metĩndjwýnh ma. Nhym me kàtãmja amijaxwe pãnh me kadjy Metĩndjwýnh mar djwýnhjamã mryo mrãn kungã nhym me axwe pãnh Metĩndjwýnhmã kubõ, me ô'ã kubõ. Nhym kam Metĩndjwýnh me ja jaxweo ajngràn tu o akno. Nãm ã me kadjy Metĩndjwýnh mar djwýnh memã Metĩndjwýnh maro ane.

² Djã nãm me no kētja, me kute Metĩndjwýnhbê ikõ màtjamã àkrēmã got? Kati, adjwýnhdjwý axwe prãmkam mekam ukaprĩn memã àkrê kêt ne tu memã kabēn rerek

* 5:1 Apýnh me õ pyka djari kunĩkôt ne me kunĩ bēngôkre.

jarẽ. ³ Ne ta me kudjwa axwe prãm kam adjwỳnhdjwỳ ta amijaxwe pãnh kum mry bô. Djã nãm me ajbit axwe pãnh kum mry bô? Kati, ta, adjwỳnhdjwỳ amijaxwe pãnh kum mry bô.

⁴ Djã nãm me kadjy Metĩndjwỳnh mar djwỳnh nhõ bẽnjadjwỳr ta amijã bẽnjadjwỳr rẽ got, ta o amiptàn amijã me kadjy Metĩndjwỳnh mar djwỳnh nhõ bẽnjadjwỳr rẽ got? Kati, Metĩndjwỳnhbit ne amijo utàn amim 'ã bẽnjadjwỳr rẽ ne amim umjuw. Ga Metĩndjwỳnh ajbit kute Arão'ã me kadjy Metĩndjwỳnh mar djwỳnh nhõ bẽnjadjwỳr mẽnha pumũ. Metĩndjwỳnhbit ne me'ã bẽnjadjwỳr rẽ.

⁵ Bir be, nãm ã Kritudjwỳ o ane. Ta kute amijo rax ne kute o amiptar ne amijã me kadjy Metĩndjwỳnh mar djwỳnh nhõ bẽnjadjwỳr rax mẽn kêt kumrẽx. Nhym bep kati, Metĩndjwỳnh ta ne amim kudjan kum,

“Mrãmri abê ikrakumrẽx. Jakam ne ba arỳm ajo ikrakumrẽx ga amipãnh ijo Abãm kumrẽx”, ane.

Nãm ã Metĩndjwỳnh nhõ pi'òk no'òk kam ã kum ane. ⁶ Ne kam ajte kum,

“Abê me kadjy Metĩndjwỳnh mar djwỳnh rã'ã rã'ã rã'ã ne. Merkixatek ne akajmã'ã Metĩndjwỳnh mar djwỳnh.

Ga kam Merkixatek nhijuk'ã gadjwỳ abê me kadjy Metĩndjwỳnh mar djwỳnh”, ane.

⁷ Mrãmri ne Jeju me kuràm me kadjy Metĩndjwỳnh mar djwỳnh mex kumrẽx. Kute amijo kubêngòkren† pykakam ar bari Metĩndjwỳnhmã kabẽn ne amijo a'uw. Kàj bê kum

† 5:7 Kritu ne amijo kubêngòkre kute mrãmri ne apỳnh me õ pyka djari kunĩkòt me kunĩ: bêngòkreja pyràk. Kubẽ kà jakamẽ me kakràtykmẽ me babêngòkremẽ ne me kunĩ: bêngòkre. Me kamròmẽ me kukràdjà kunĩ kubêngòkreo aben pyràk. Jakam dja ga Karõ 17.26 jarẽn ama.

kabên ne amra. Metĩndjwỳnh pydji kute tykbê utàr kadjy nàrà̀m kum kabênkam muw. NhyM Metĩndjwỳnh arỳm kabên ma, Jeju jaxwe kêt ne kute Metĩndjwỳnh kabên mar ne kôt ar amijo bakam Metĩndjwỳnh arỳm kabên ma.

⁸ Be, djã nãm kubê Metĩndjwỳnh Krakam kute tokrymẽ kaprĩ mar kêt got? Kati, nãm te kubê Metĩndjwỳnh kra, te axwe kêt ne mã tokry man kaprĩ ma. Nãm tokry katikôt Bãm kabên man kôt ar amijo ba. Te tokryn mã Bãm kabên mar 'ãno dja. Kam ne kute kabênkôt ar amijo baja mar mexkumrẽx. ⁹ Ne kam arỳm mrãmri tokryo ino re. Tokryo ino ren kam arỳm kubê me utàr djwỳnhkumrẽx ne. Me kute Jeju kabên mar ne kute kôt ar amijo ba, me ja ne me utàn kam kute ar meo ba rã'ã rã'ã rã'ãmã.

¹⁰ Be, kute me utàrkumrẽx ne kute meo ba rã'ã rã'ã nhyM kam kôt Metĩndjwỳnh kum,
 “Abê me kadjy Metĩndjwỳnh mar djwỳnh nhõ bẽnjadjwỳr
 rax. Merkixatek nhijuk'ã gadjwỳ abê me kadjy
 Metĩndjwỳnh mar djwỳnh nhõ bẽnjadjwỳr rax”,
 ane.

Nãm ã Metĩndjwỳnh kute amim arkam ã kum ane.

Me abatàn kute me prĩre pyràk.

Kô k 3.1; Ep 4.14

¹¹ Nã bãm bit ar ije ar amã Merkixatek jarẽnhmãn kam ajte akubyn ar amã arẽnh kêt. Nã bãm ren ar ar amã kunĩ jarẽ ga ren ar mar kêtumrẽx ne, ar ajamakke kêtkaM, ar ajamak'ã tomkam. Dja gar on amijamak'ã tom tan gop mỳjja ma. ¹² Nã gãm ar amrêbê memã Metĩndjwỳnh kabên'ã adjujarẽnhmãn ajte mar kêt ne.

NhyM bep kati, me'õ gêdja akubyn ar amã Metĩndjwỳnh kukràdjà kraxkôt arẽ. Nã gãm ar aje me bixadjwỳr ny pyràk. Me bixadjwỳr ny ne me kute kà kaôrbit mar ne kute me ôkumrẽx kur kêt. Gar gadjwỳ aje mỳjja mar kêt rã'ãkam aje me bixadjwỳr ny pyràk. ¹³ Ar

aje mỳjja mar kêt kam aje me prĩne pyræk. Ar aje kà kaôr rã'ã. Nhym bê ne ga gop ar ajabatàn hkam aje gop mỳjja mar. Ar aje Metĩndjwỳnh kabẽn katàtja o amipræk kêt rã'ã.

¹⁴ Bep ate ne me abatàn h. Me abatàn h ne me kute me òkumrẽx kur. Nã gãm ar ren Metĩndjwỳnh kabẽn maro tẽn ren o amipræk ne ren arek maro tẽn o tẽn o tẽn ren marja amũ o abikamẽn ho tẽn kam ren aje me abatàn h pyræk ne kam ren prĩne ren mỳjja kabi, prĩne mỳjja punumẽ mỳjja mexmẽ prĩne ren kabin mỳjja man kam ren aje me abatàn h pyræk.

6

¹⁻³ Gwaj Kritukòt babikamẽn hmo kraxkam arỳm Kritu kukràdjà kwỳ ma. Nãm me Kritu kukràdjà kraxbit gwaj bamã arẽ gwaj kuma. Mỳj kukràdjà krax ne gwaj arỳm kuma?

Me batyk kadjy bamã bajaxwe kĩnhja wãnh kum banhírer ne kam baje amikajmãtã Metĩndjwỳnh mar ja. Nhym ajte me kute ngòmã me bajangjêh'ã ujarênhjadjwỳ. Ne kam ajte me kute Metĩndjwỳnhmã me bapymjỳr gu me kum badjapênh kadjy me kute me bajã ikra jadjwỳr ja. Ne kam ajte me batyk ne akubyn batĩn ne bakator nhym Metĩndjwỳnh kute me bamã bajaxwe pãnh jarênhmã ne kute me jamã me tĩn rã'ã rã'ãmã arênh ne ate me jamã me biknor rã'ã rã'ã jarênh ja. Ja ne mar tũm, kukràdjà krax.

Djãm ajbit ne gwaj baje marmã? Kati, kwỳ rax ne gwaj baje mar kêt rã'ã. Gwaj on ajte amũ ijukri on mỳjja 'òdjwỳ man gop amũ maro babikamẽn ho mō. Nã gãm ar te o anen te aje kàjmã mar kamênhmãn kam mã akubyn ama, akubyn kraxbit maro mō.

Nhym bep kati, dja gwaj on amũ ijukri on mỳjja 'òdjwỳ ma. Gwaj baje mỳjja marmã ne Metĩndjwỳnh amim gwaj

bajã karõ, gwaj on kuma, kute gwaj bamã no mex jadjãr jabej dja gwaj on ã o ane.

*Me kute Metĩndjwỳnhbê amijo akẽx karõ memã kabẽn.
Idja 10.26*

⁴ Nhyim bep ate ne me kute Jeju kangaja. Tô mã dja me me on akubyn Metĩndjwỳnh'ỳr meo akẽxmã? Kati, gẽdja me te meo ane. Arỳm ne Metĩndjwỳnh me ja no bõnh pydji nhyim me arỳm amim kuma. Jeju kute me utãrmã kãjkwa kurũm bõxja ne me arỳm amim kuma. Nhyim Metĩndjwỳnh ta memã Karõja ngrã nhyim meo ba. ⁵ Nhyim me kam arỳm mrãmri Metĩndjwỳnh Kabẽn mexkumrẽxmã kato. Ne arỳm amim mỳjja pyma kwỳ pumũ. Jeju akati 'õkam akubyn bõx ne kute meo ba kajmã'ã mỳjja pymaja kwỳ pumũ. Omũnh kajgon kam ate amibê kanga, amibê kurê ar o ba.

⁶ Be, me ja, me kute bit amim Jeju marmãn ajte jãm kute kubê amijo akẽx ne kangaja, djãm me kute akubyn Metĩndjwỳnh'ỳr meo akẽxmã? Arkati, gẽdja me te meo ane, dja me te akubyn 'ỳr kute meo akẽxmã te meo ane. Mỳkam? Bir, me kute Jeju kangaja ne me o ajkẽ. Nãm kute mrãmri ne me kute Metĩndjwỳnh krao bikẽnh ne kute akubyn pĩte'y'ã nhõrkam o bikẽnhja pyrãk. Nhyim kam me kãtãm Jeju japryõ kumex.

⁷ Ë, gop ar pyka mexja pumũ. Na ne pyka jakam bixadjwỳr krãptĩ ne kam amũ pyka ja mã prõt ne. Nhyim me kam kam mỳjja kren prĩne 'ã karên o djuw mex nhyim kam ingrõt ne abatãnh. Õ wỳnh kute krên ne tỳxmã ne ingrõt ne õn kumex. Pyka mex ne ja. Pyka mex ja ne Metĩndjwỳnh arỳm kum kĩnh ne õkre kadjwỳnhbê amim,
—Pyka ja ne mexkumrẽx. Ba kum kĩnh jadjã ne kum djwỳ jarẽ gẽ mã arek kam djwỳ nhingrõt ne õn kumex, ane.

⁸ Nhyr bep ate ne pyka punu. Nãm te na axidjuw nhyr me te karê nhyr mã mrynhĩmẽ mjêxêtte nhĩbit apôx ne kumex. Pyka kajgo mexi. Me te kam mỳjja nhingrôt jabej, djwỳ nhingrôt jabej ne kam ôkre kadjwỳnhbê amim,

—Axuk wãnh nõre. Ba tu kanga gê wãnh nõre. Mỳj kadjy dja ba prĩne karên 'ãno dja? Gê me'õ tu kum adjã gê prĩne xêt. Kê, ane.

Dja ã Metĩndjwỳnh me kute akubyn kubê akêxjamã anen kuwyo imôkam me kurẽ.

⁹ E kum ar ga, akmere ar, àpnhĩre ar, ar imã ar akĩnhja, djãm ar amã ne bar ikabên ja jarênho iba? Kati, arỳm ne bar ar amexkôt ar ama. Ar ga ne gar tu amim Jeju markumrêx nhyr arỳm ar apytã. Ga kam ar aje pyka mexja pyrãk.

¹⁰ Djãm Metĩndjwỳnh punu got. Djãm kute ar amar kêt got. Kati, dja katãt ar adjãpênh man o biknor kêt ne. Nã gãm ar amã Metĩndjwỳnh kĩnhkumrêx ne kam ô'ã õ me mex jadjwỳo djuw mex ar o aba. Ne arek ar o aba rã'ã ne. Kam dja Metĩndjwỳnhdjwỳ ar amar rã'ã ne.

¹¹ Bir be, gora ar 'ãno dja. Nã bãm ar inhôkre kadjwỳnhbê,

—Gora gê ar ĩ pỳnhkôt kum Jejuwã kĩnh ne kam kĩnh rã'ã rã'ãn kôt ar amijo ban inomã kumẽ, ane.

Nã, dja gar ã anen inomã amẽn kam arỳm 'ỳr bôx. Ar aje amim kam amakja ne aje amim kamnhĩxja arỳm 'ỳr bôx.

¹² Nã, gora ar amã adjukanga kêt ne 'ãno djan inomã amẽn kam 'ỳr bôx. Kwãrik wãnh ar amã adjukanga kêt. Ê, me kute amim Jeju mar ne kute akrãnmã arek amiwỳr kam amakja, me tãmbit dja me 'ỳr bôx. Mỳjja mex, Metĩndjwỳnh kute 'ã memã katãt kabên pydjĩn arênhja'ỳr dja me bôx. Bir be, gora on ar ja'ã amijakren me kudjwa mỳjja ja kunĩ 'ỳr bôx.

Metîndjwÿnh kute Abraãomã tàm djwÿ jarênh mãm dji.

¹³⁻¹⁶ Ar me bakukãmãrebê Abraãoja pumû. Amrêbê *Metîndjwÿnh* Abraãomã kabên pydjîn arê. Nãm kum, “Ë, mrãmri dja ba ajo kÿnh ne amã atàm djwÿ krãptÿ ngã nhym aptàn kumex.

Ba ibê *Metîndjwÿnh* ne ba amã ikabên. Mrãmri ne ikabênja”, ane.

Be, *Metîndjwÿnh* kute Abraãomã kabên pydjîn arênh ne ja. Nãm Abraão akrãnmã arek amiwÿr kam aman kam 'ÿr bôx. *Metîndjwÿnh* kute kum kabên pydjîn arênhja'ÿr bôx ne arÿm kran arÿm tàm djwÿ.

Me babêngôkre baje memã bakabên pÿnh ne arênh kady ne atemã me'ô'ÿr mrã. Me'ô kute raxo me bajarenh ne kute me bakabên marmã 'ÿr tèn kum arê, kute adjwÿnhdjwÿ me bakabên mar ne kute ar o bamã. Gu me kum bajêx karô, kum bajêx nhym kute o ngrykmã ajte atemã me'ô'ÿr mrãn kum me bakabên ja jarê.

Nhym bep *Metîndjwÿnh* kute Abraãomã kabên pydjîn arênhkam nhÿnh ne atemã me'ô *Metîndjwÿnh* kuràm rax got kute adjwÿnhdjwÿ kabên marmã? Kati, *Metîndjwÿnh*bê kumkati pydjii. Kam ne ta tu aminhidji jarênh Abraãomã kabên pydjîn arên kum,

“Ë, mrãmri dja ba ajo kÿnh ne amã atàm djwÿ krãptÿ ngã nhym aptàn kumex. Ba ibê *Metîndjwÿnh* ne ba amã ikabên. Mrãmri ne ikabênja”, ane.

¹⁷ Nãm kabên pydjîn arên kam ta aminhidji jarê. Nãm arÿm 'ã amim karôn kôt kabên pydjîn arê. Nãm akubyn atemã kabên 'ô jarênh kêt kumrêx. Nãm ta arÿm amim pry pydji jarê. Ne kam me kute prÿne amim mar tÿxmã, *Metîndjwÿnh* kute memã kabên pydji jarênh nhym me kute amim mar tÿxjamã ne kabên pydjîn arên kam ta memã aminhidji jarê.

¹⁸ Bir be, kumrêx ne kabên pydjîn arên kam adjwÿnhdjwÿ ta aminhidji jarên memã,

—Ba ibê Metîndjwÿnh dja ba ajo kînh, ane.

Dja akubyn atemã kabên 'õ jarênh kêtkumrêx ne. Dja 'êxnhî kêtkumrêx. Djãm Metîndjwÿnh kabênkam 'êxnhîn kute akubyn memã kabên 'õ jarênhmã got. Arkati. Kam dja gar ja man kam ajte atÿxkumrêx, ajte akînhkumrêx. Atÿx ne tu amim kamnhîxkumrêx ne mã kam ama. Metîndjwÿnh arÿm gwaj bakukãm gwaj bamã mÿjja mex jarê gwaj mã kam ama. Kute gwaj bapytàrmã ne gwaj arÿm 'ÿr baprôt nhym arÿm gwaj bapytàn gwaj bamã mÿjja mex jarê, kàjkwa jarê.

¹⁹ Gora gwaj kam batÿx ne tu amim kamnhîxkumrêx ne mã kam ama. Mrãmri dja gwaj 'ÿr bôx. Kam ne gwaj bakadjwÿnhbê badjumar mex ne baku'ê tÿx ne. Mrãmri ne me kute ngômã kên rênh nhym kà arek arij tÿx nhym ngô kute o ba kêt ja pyræk. Dja gwaj ã bakadjwÿnhbê badjumar mex ne batÿxo ane. Gwaj baje amim Metîndjwÿnh kabên kamnhîx ar o babakam dja gwaj ã bakadjwÿnhbê badjumar mex ne batÿxo ane.

Metîndjwÿnh nhõ kikreti ja ma. Kadjwÿnhbê Metîndjwÿnh nhõ mÿjja nêje kubêkàti wajêt. Nhym me kadjy Metîndjwÿnh mar djwÿnh nhõ bënjadjwÿr raxbit 'ÿr ngjênh.

²⁰ Nhym bep Jeju ne ta kàjkwakam ûrkwāti djwÿnhjamã wadjà. Me bakukãm ne 'ÿr wabin kum wadjà. Kute me banhirâr ne me bajo djuw mex ne me bakadjy Metîndjwÿnhmã kabênmã. Dji kubê Metîndjwÿnh mar djwÿnh djwÿnhkêt. Kubê Metîndjwÿnh mar djwÿnh nhõ bënjadjwÿr rax dja rã'ã rã'ã ne. Merkixatek ne kajmã'ã Metîndjwÿnh mar djwÿnh nhym kam Jeju ijuk'ã kubê Metîndjwÿnh mar djwÿnh ne me bakadjy Metîndjwÿnhmã kabên ne.

7

Jeju kute raxo Merkixatek jakrenh.

¹⁻³ Be, mỳj me'òbê ne Merkixatekja? Nãm krîbê Xarêkam me ja nhõ bẽnjadwỳr ne adjwỳnhdjwỳ kubê Metĩndjwỳnh pymao kubê kumkati mar djwỳnh. Idji kutewa ne katàt me mrānh nhõ bẽnjadwỳr, Merkixatek. Idji jatāri jadjwỳ ne me umar mex nhõ bẽnjadwỳr. Krĩ nhidjibê ne Xarê. Me umar mex ne ar bakam ne me tu 'ã kum idji. Me ò bẽnjadwỳrjamã, Merkixatekmã ne me me umar mex nhõ bẽnjadwỳr ane.

Ije nhym mã ne bāmmê nã ar kute? Kati, e kum bep me kute bāmmê nã noo ar omũnh kêtumrêx ne me kute ar arênh kêtê. Kon ne. Ingêtmê kwatynhmê me kute omũnh kêt mexi. Me kute rwỳkkôt mar kêt, nã 'õ kurũm rwỳkkôt mar kêt ne ajte kute tyk djà kôt mar kêtumrêx. Nãm tu nhi'ānh tẽ. Kute Metĩndjwỳnh Kra pyrak ne me kadjy Metĩndjwỳnh mar djwỳnh rã'ã rã'ã ne.

Be, ta ne Abraão kutã tẽn kajpan kum kabên jarênh kĩnhkumrêx ne. Abraão arỳm mỳj bẽnjadwỳrja ar'ỳr prõt ne ar kubĩn kam akubyn tẽ nhym Merkixatek kutã tẽn kajpan o kĩn ne.

Nhym kam kum mỳjja kwỳo ajkij. Kute mỳjja kwỳo mōrjao ajkij nhym mã o mō. Abraão ò mỳjja kunĩ kryre ne kurênh aben kadjy kum kungã. Merkixatekmã apỳnh aben kadjy o pōxo tẽn kum kungã nhym abenã rēnhkam arỳm rax nhym kam mã o mō.

⁴ Bir be, me Merkixatek raxja pumũ. Te Abraão bẽnjadwỳr rax ne kute nêkrêx pytārja tu kute kum kwỳo o bikjêrja pumũ. Djām Merkixatek ngri got.

⁵ Atũmã ne mekbê Rewi me ò mỳjja jamỳnho ba. Mōjdjê ne kukràdjakôt mekbê idjaermã kum,

—Gora me amũ anhõ mỳjja wã kwỳo ajkjen amũ mekbê Rewibê me kadjy Metĩndjwỳnh mar djwỳnhmã angã, amũ

amikutã memã kwỳ ngã gê me ta ò nêkrêxkôt amim amỳ, ane. Nhyim me kam ã anen ò mỳjja kwỳo ajkijn kam amũ amikutã mekbê Rewimã òro tẽ, me ta ò krôkam me jamã kungã nhyim me amim amỳ. Amê kubê Abraão tãmdjwỳ nhyim mekbê Rewi kute amim amỳnhja tãm ne kubê ò nêkrêx.

⁶ Nhyim bep atemã ne Merkixatek. Mekbê Rewi 'ò kêtê. Nãm te kubê mekbê Rewi kêt ne kam tu Abraãobê nêkrêx kwỳo ajkijn kum kĩnh jadjà. Metĩndjwỳnh arỳm Abraãmã kabên pydjìn arên kum mỳjja mex jarê nhyim Merkixatek arỳm kuman kam kôt Abraão kĩnh ne. ⁷ Be, mrãmri ne me'ò kute meo kĩnhja ne raxo tãmja jakre. Me rũnh ne me meo kĩnh.

Kam ne ba ar amã,

—Me Merkixatek raxja pumũ.

⁸ Mekbê Rewibê Metĩndjwỳnh mar djwỳnh ne me ò nêkrêxo ba. O ban kêt nhyim me pãnh kamingrãny amũ ijuk'ã ajte Metĩndjwỳnhmã àpênh ba nhyim me ajte memã òro ba. Nhyim bep Merkixatek pydji ne tĩn rã'ã rã'ã ne kubê ò mỳjjao mō. Ga me Metĩndjwỳnh nhō pi'òk no'òkkam Merkixatek'ã kute tĩn rã'ã: rã'ã, anhỳrja pumũ. Be, Merkixatek raxja pumũ.

⁹⁻¹⁰ Nhyim kam Merkixatek Abraão kutã tẽn kajpa nhyim kum ò mỳjja kwỳo ajkij nhyim mã o mō. Nhyim kam Rewidjwỳ kute kum òr pyràk. Rewibê ne Abraão tãmdjwỳ. Rewi ne ingêt kukãmãrebê Abraão ngrekam nōr rã'ã, kraxje kadjy kute Rewi bãm djir kêt, ngrekam nōr rã'ãkam ne Abraão Merkixatekmã ò mỳjja kwỳo ajkij. Nhyim kam Rewidjwỳ kute kum òr pyràk. Nhyim kam amũ atũmã Rewi wajêt ne ruw ne kam amũ abatàn nhyim kam tãmdjwỳ amim mỳjja jamỳnho ba, ò nêkrêxkôt me ò mỳjja jamỳnho ba. Nhyim bep Merkixatek mekbê Rewi kajmã'ã nêkrêxo mō, Abraão nhō mỳjjao mō.

¹¹ Arão kôpdji'ã mekbê Rewibê me kadjy Metîndjwÿnh mar djwÿnhja ne memã Môjdjê kukràdjà jarênho tẽ. Arão ne kubê me kadjy Metîndjwÿnh mar djwÿnhho kutewa nhym kam tâmdjwÿ mekbê Rewija amũ aben nhijuk'ã kubê Metîndjwÿnh mar djwÿnh ne Arão kôpdji'ã memã Môjdjê kukràdjà jarên me kadjy Metîndjwÿnh ma. Nhym me te: kôt kute amijo ba mexmã. Nhym kam atemã me kadjy Metîndjwÿnh mar djwÿnh 'õ ne kato. Atemã. Arão kôt kêtê. Merkixatekkôt ne kato. Nãm ren me mekbê Rewikôt mex nhym ren atemã ny 'õ kator kêt kumrêx ne. Nãm me te: amimex ne te: axwe kêt nhym kam kadjy nyja kato.

¹² Bir be, atemã ne me kadjy Metîndjwÿnh mar djwÿnh ny 'õ kato nhym kukràdjàdjwÿ ne kôt atemã. ¹³ Gwaj banhô Bênjadjwÿr'ã ne idjujarênhja. ã mũm me ja kurũm ne kato. ãm atemã. Djãm me ja 'õ kubê me kadjy Metîndjwÿnh mar djwÿnh got? Ne kute Metîndjwÿnh nhõ ngônho ki'ã kum mry bôr got. Arkati.

¹⁴ Mekbê Djuda kurũm ne kato. Me ja, mekbê Djuda ne me Metîndjwÿnhmã àpênh kêt kumrêx. Nhym me kunĩ arÿm kôt omũ. Djã nãm Môjdjê me jamã kum,

—Me ga dja ga me abê me kadjy Metîndjwÿnh mar djwÿnh, ane got? Kati, mekbê Rewimãbit ne arẽ.

¹⁵ Be, arÿm kute amirĩt tẽmja pumũ. Atemã me kadjy Metîndjwÿnh mar djwÿnh 'õ ne kato. Mekbê Rewi kurũm kator kêtê. Ne kam kute Merkixatek pyræk. ¹⁶ Mÿjkôt ne kubê me kadjy Metîndjwÿnh mar djwÿnh? Djã nãm mebêngôkre ta Môjdjê kukràdjækôt kute amũ aben nhijuk'ã abenmã rero tẽn kam Jeju'ÿr bôx ne kum kure nhym kam arÿm kubê me kadjy Metîndjwÿnh mar djwÿnh? Djãm mekbê Rewi 'õ? Kati. Bir, mÿjkôt? Mÿjja tÿxkumrêx kôt. Ta tu tĩn rã'ã:n kute tĩn o ino rer kêt kumrêx. Kam ne

Metĩndjwỳnh 'ã me kadjy Metĩndjwỳnh mar djwỳnh nhõ bẽnjadjwỳr mẽ. ¹⁷ Metĩndjwỳnh nhõ pi'òk no'òkkam kute, “Abê me kadjy Metĩndjwỳnh mar djwỳnh rã'ã rã'ã rã'ã ne. Merkixatek ne akajmã'ã Metĩndjwỳnh mar djwỳnh.

Ga kam Merkixatek nhijuk'ã gadjwỳ abê me kadjy Metĩndjwỳnh mar djwỳnh”, anhỳrja pumũ.

¹⁸ Be, Mõjdjê kukràdjà tũmkõt mekbê Rewi kute aben nhijuk'ã abenmã Metĩndjwỳnh mar djwỳnh rerja ne arỳm tũm ne wãnh nõ. Arỳm kajgo mexi. Kute me utàr kêt. Kam ne Metĩndjwỳnh wãnh kudji nhym nõ.

¹⁹ Mõjdjê kukràdjà kute mỳjjao mex kêt. Nãm me te: kute kõt amijo ba ne te: kõt kute amijo mexmã. Nhym bep ajbir ne Metĩndjwỳnh me bawỳr mỳjja mex jano, Jeju jano. Tãm ne gwaj kamnhĩxbê ar baban kõt Metĩndjwỳnh'ỳr bõx. Nhym prĩne raxo, mexo Mõjdjê kukràdjà tũm jakre. Kõtbit ne gwaj Metĩndjwỳnh'ỳr bõx.

²⁰⁻²¹ Be, gwaj banhõ Metĩndjwỳnh mar djwỳnh ny, mex-tireja pumũ. Kumã ne Metĩndjwỳnh kabẽn pydjĩn arẽ. Bep me ja, me kadjy Metĩndjwỳnh mar djwỳnh tũmja ne Metĩndjwỳnh amim me umjỳr kajgon kute memã kabẽn pỳnh jarẽnh kêt. Nhym bep ate ne Jeju. Metĩndjwỳnh kute amim arkam kum kabẽn pydjĩn arẽn kum,

“Ba ibê Bẽnjadjwỳr ne ba arỳm amã ikabẽn pydjĩn arẽ. Dja ba atemã ikabẽn 'õ jarẽnh kêt.

Ga dja ga abê me kadjy Metĩndjwỳnh mar djwỳnh rã'ã: rã'ã ne”, ane.

²² Be, Jeju kukràdjà nyja mexo kute tũm jakrenh mexi. Nhym Metĩndjwỳnh kute kukràdjà nykõt me bamã mỳjja mex jarẽnhja dja mrãmri me bawỳr bõx. Jeju ta dja Metĩndjwỳnh kabẽnkõt mỳjja mex nêje omũnh 'ãno djan me bamã kungã.

²³ Nà, Jeju mexo kute me kadjy Metĩndjwỳnh mar djwỳnh tũm jakrenhja pumũ.

Ë, mỳjja 'õdjwỳ. Me ja ne me krãptĩ. Nãm me aben nhijuk'ã tyk tẽ. Te kute àpênh 'ãno ãm rã'ãmãn mã aben nhijuk'ã kubêngette ne tyk tẽ.

²⁴ Nhym bep Jeju pydji ne mã: tĩn rã'ã rã'ãn kam mã kubê me kadjy Metĩndjwỳnh mar djwỳnh rã'ã rã'ãn atemã amidjõ'ã me'õmã rer kêt-kumrêx. ²⁵ Ajbit ne tĩn rã'ã rã'ãkam arek Metĩndjwỳnhmã me banêje kabên ne me bajo à'wỳr ar ba 'ãno dja. Nãm me bapytàn ar me bajo ba. Nhỳnh me baja? Bir me baje tu amim Jeju kamnhĩxkõt baje Metĩndjwỳnh'ỳr amijo akêxja, me batãm ne ar me bapytàn me bajo ba. Gêdjãm ar me bajo ba rã'ã ne. Gêdja me bapytàr rã'ã: ne, rã'ã rã'ã.

²⁶ Bir be, me kadjy Metĩndjwỳnh mar djwỳnh nhõ bẽnjadjwỳr rax ã kute anhyr ne gwaj bamãnhkutã. Nãm mexo uma. Kute axwe 'õ mar kêt-kumrêx. Punu 'õ kam nør kêt-kumrêx. Nãm mũm mexo amiptã nhym ate me axwe wãnh ar ba nhym Metĩndjwỳnh o rax ne kàjkwamã amiwỳr o wabin kàjkwa nhiby ỳr nhym kam ar ro'ã ar ba.

²⁷ Nà, atemã. Kute me kadjy Metĩndjwỳnh mar djwỳnh nhõ bẽnjadjwỳr tũmja pyræk kêt. Djãm kute Metĩndjwỳnh mar djwỳnh nhõ bẽnjadjwỳr tũm kudjwa myt kunikõt ta amijaxwe pãnh Metĩndjwỳnhmã mry par ne bõr ne õr got. Me tãm ne me kumrêx amijaxwe pãnh kum mry pan kubõn kungãn kam atãri me kunĩ jaxwe pãnh kum mry pan kubõn kungã. Djã nãm ã Jeju me kudjwa ane got? Arkati, nãm ta Metĩndjwỳnhmã me axwe pãnh tyk pydji. Nãm me axwe pãnh Metĩndjwỳnhmã amikanga pydji nhym tũmrãm dja ajte memã tyk kêt ne.

²⁸ Mõjdjê kukràdjækõt ne me axwe prãm nhym me amim me umjuw. Nhym bep tũmrãm, Mõjdjê kukràdjã arỳm tũmkam ne Metĩndjwỳnh amim krao katon amim

kudja. Nhym kam prïne Metĩndjwỳnh kabẽnkõt amijo ba. Axwe prãm kêtikumrẽx. Dja amũ tũmràm axwe 'õ kêtikumrẽx rã'ã rã'ã, tãm ne amim kudjan kam kum kabẽn pydjìn arẽ. Ne kam adjwỳnhdjwỳ aminhidji jarẽn kum,

—Ba ne ba amijo apytàn amim adja. Ga abê imar djwỳnh nhõ bẽnjadjwỳr rax, ane. Be, nãm ã anen kam amim Kra dja.

8

Me kadjy Metĩndjwỳnh mar djwỳnh nhõ bẽnjadjwỳr ny ne Jeju.

¹ Bir be, ije ar amã arẽnh ja ma. Arỳm gwaj banhõ Metĩndjwỳnh mar djwỳnh nhõ bẽnjadjwỳr rax ã kute anhỹrja pumũ. Nãm kàjkwakam Metĩndjwỳnhbê kumkati krĩ djatikam ubòk'ãnh ikò'ã nhỹ, kubê bẽnjadjwỳr raxkam ubòk'ãnh nhỹ. ² Kubê Metĩndjwỳnh mar djwỳnh nhõ bẽnjadjwỳr ne kam Metĩndjwỳnh nhũrkwāti kadjwỳnhbê kumoka'êkam àpẽn ar ba. Ũrkwāti djwỳnhkam àpẽn ar ba. Djãm me ikrao ne me kum kikre got? Kati, Bẽnjadjwỳr djwỳnh ta ne amim kikre nhym kàjkwakam dja. Ũrkwã djwỳnh ne ja. Nhym kadjwỳnhbê kumoka'êkam Metĩndjwỳnh nhõ mỳjja nêje kubêkāti wajêt. 'Ỗr ne arỳm wadjàn kam kam àpẽn ar ba.

³ Me kadjy Metĩndjwỳnh mar djwỳnh nhõ bẽnjadjwỳr rax kunĩ ne Metĩndjwỳnhmã mry bôn kum kungãn kõt kum kĩnh djà ngã. Kadjy ne amim me umjuw. Nhym gwaj banhõ Metĩndjwỳnh mar djwỳnhdjwỳ mỳj ne kum kungã? Kati, ãm ta ne kum amingã.

⁴ Nãm ren jakam, pyka jakam ar ban ren kubê me kadjy Metĩndjwỳnh mar djwỳnh kêtikumrẽx ne. Ga me kadjy Metĩndjwỳnh mar djwỳnh kumex ne kute Môjdjê kukràd-jàkõt Metĩndjwỳnhmã kĩnh djà nhõr rã'ãja pumũ. Kam ne

ren jakam ar ban ren arým kubê me kadjy Metîndjwýnh mar djwýnh kêt.

⁵ Pyka jakam Metîndjwýnh nhõ kikreja ne kàjkwakam ũrkwāti djwýnhja'ã amijakre nhym me kam kam àpênh ar ba. Ô'ã ne pykabê õ kikreja. Nãm Môjdjê kute kikre nhípêxmã nhym kam Metîndjwýnh prĩne kôt kum 'ã karõ, kute kum 'ã karõ nhym kute kôt kum ipêxmã. Kute kàjkwakam ũrkwāti ja'ã akren kute kôt kum ipêxmã ne kum 'ã karõn kum,

“Gora prĩne inhŭrkwāti djwýnh'ã akren imã ipêx, ane.

Krãnhre'ã ije amã akrejakôt dja ga ipêx”, ane.

Be, mýjja kàjbê mex ne ja. Kàjkwakam ũrkwã djwýnh ne mexkumrêx, nhym bep ja, pykabê ja ne ô'ã. Ô'ã ne kam kàjbê mex.

Nhym bep ũrkwã djwýnh ne mrãmri wýnh, mex-tire. ⁶ Nhym àpênhdjwý mextire. Metîndjwýnh ne kum àpênh ny jarê nhym àpênhja prĩne mexo kute me kadjy Metîndjwýnh mar djwýnh tũm djàpênh tũm jakrenh. Nhym kukràdjà nydjwý prĩne mexo kute tũm jakrenh. O ne Jeju Metîndjwýnh'ýr mebêngòkreo bõx. Nhym Metîndjwýnh me bamã kabên pydjín arên kam me bamã mýjja mex jarê. Mýjja mexja ne mexo tũmja jakrenh mex ne. Kôt kukràdjà nydjwý mexo tũmja jakrenh mex ne.

⁷ Nãm ren Môjdjê kukràdjà ajmã kute kêt nhym ren ajte kukràdjà ny kator kêtukumrêx ne. Nãm ren kutewaja mex nhym ren ijukri ny 'õ kator kêtukumrêx ne.

⁸ Nhym bep kati, nãm kukràdjà tũmja kute me utàr kêt nhym kam pãnh Metîndjwýnh kukràdjà ny kute me utàrja pãnh o kato. Nãm mekam kĩnh kêt ne memã kum,

“Adjým, amũ akati 'õkam dja ba mekbê idjaer kunĩmã atemã ikabên ny 'õ jarênh mãmđji, atemã kukràdjà ny 'õ.

Nà, Djuda aben nhijuk'ã tàm djwỳjamã gêdja ba atemã kukràdjà ny 'õ jarẽ. Ba ibê Bẽnjadwjỳr ne ba me amã ikabên ne.

⁹ Ate ne nyja. Ate ne tùm, ije me akukãmãremã arênhja, tãm ne tùm.

Amrêbê ne ba me akukãmãre pa 'ãbyn pykabê Edjitu kurùm meo ikaton kam ar meo iban memã ikukràdjà ja jarẽ.

Nhym be nãm me ikabên mar prãm kêt ne arik ar ba. Ba kam amipãnh tu me kanga.

Ibê Bẽnjadwjỳr ne ba me amã ikabên ne.

¹⁰ Bep jakam dja ba mekbê idjaermã ikukràdjà ny jarẽ. Amũ akati 'õkam dja ba memã ny 'õ jarẽ.

Ba ibê Bẽnjadwjỳr ne ba me amã ikabên ne.

Me õkre kadjwỳnhbê dja ba ikukràdjà jao adjàn me ajamak krekre'ãdjwỳ pi'õk no'õk ne.

Ne kam meo inhõ me jakumrêx nhym me amipãnh Metĩndjwỳnho ipytàn kam amim ijo Metĩndjwỳnhkumrêx.

¹¹ Djãm me õbikwamẽ kute abenmã kum, nàr me kamy kute abenmã kum,

'On amim Bẽnjadwjỳr djwỳnh ma', anhỹrmã.

Kati, me kunĩ dja arỳm amim ima. Me kàtømmẽ me rũnhmẽ me kunĩ dja me amim ima.

¹² Ba kam me kute ikam amikràjakam idjukapri ne kam me ikam axweja tu o akno", ane.

Nãm ã Metĩndjwỳnh kukràdjà ny'ã ujarênh ane. ¹³ Kute kukràdjà ny jarênhkam arỳm õbê jao tùm ne. Be, ga mỳjja arỳm tùm tēm ne arỳm biknor 'yrja pumũ.

¹ Amrêbê ne Metĩndjwỳnh prĩne kukràdjà tũmja, kukràdjà kutewaja'ã memã karõ, kõt me kute ar amijo ba ne kum kabẽn ne kum àpẽn kadjy. Nãm me pykabê kum kikren kam kam kum kabẽno ku'ê.

² Nãm me kubêkãmẽ mrykãmẽ pĩponho kikren ajkwa krekre'ã kubêkà nhõ. Kikrebê kumkati ne ja. Kam ne ngõnhpõktimẽ pĩponh ku'ê. Nhym djwỳ me kute Metĩndjwỳnhmã õr ne pĩponhkam adjwỳrjadjwỳ ikwã. Apỳnh mỳjja ku'ê djari ne ja.

³ Kadjwỳnhbê ne kumoka'ê. Nhym kam nêje kubêkà wajêt. ⁴ Kam ne kẽn karỳro kikre kudjỳ djà bõr djãmẽ kẽn karỳro pĩo rara krākà djyjamẽ ku'ê. Nhym kẽn karỳrreo pĩo rara krākà djy kam ne ngõnh dja. Kẽn karỳro ngõnhkam djwỳ nhidjibê “Mỳj ne ja” nỳt ne dja. Nhym kam kam Arão nhõ kõ me aêrbê ingrõt ne õja nõ. Nhym kam kamdjwỳ Metĩndjwỳnh kute amikabẽn'ã kẽn no'õkja amẽ nõ.

⁵ Nhym kẽn karỳro pĩo rara krākà djyja'ã Metĩndjwỳnh kadjy mrãnh djwỳnh amẽ ar karõ kàjbê prêkja aben kutã dja. Metĩndjwỳnhbê kumkatiti:, Metĩndjwỳnh py-mati, Metĩndjwỳnh mexo tuknĩ kadjy mrãnh djwỳnh karõ nhipêx ja dja. Pĩo rara 'ã ijê djà'ã dja. 'Ã ijê djà ja ne me kadjy Metĩndjwỳnh mar djwỳnh nhõ bẽnjadjwỳr mry kamrõo kaprêprêk nhym Metĩndjwỳnh apỳnh me axwe djari tu o akno. Aj, djãm on ije ar amã prĩne ja jarẽnhmã got. Ba ar amã mỳjja 'õdjwỳ jarẽ.

⁶ Be, nãm ã Metĩndjwỳnh nhõ kikrekam apỳnh mỳjja ku'ê djari ku'ê ane. Nhym me kadjy Metĩndjwỳnh mar djwỳnh kàtãm myt kunĩkõt kikrebê kumkatikam wangij ne kam kam àpẽn ar ba.

⁷ Nhym bep me kadjy Metĩndjwỳnh mar djwỳnh nhõ bẽnjadjwỳr rax pydji ne kadjwỳnhbê kumoka'êjamã wangij. Djãm myt kunĩkõt? Arkati, kum ngorekambit.

'Yr ngjênh nhõ akati apôxkambit ne 'yr ngjênh pÿnh ne. Nhym ajte kum ngore nhym ajte 'yr wadjà. Akati pÿnhkambit. Djã nãm ýkam 'yr wangij? Kati, mry kamrõ ne 'yr o wangijn Metĩndjwÿnhmã kungã. Ta amijaxwemẽ me kàtàmja jaxwe pãnh ne kum kungã. Me kute mar kêt ne kute Metĩndjwÿnhkam amikràò ba pãnh ne me ô'ã o mrãn o wangijn kum kungã.

⁸ Jakõt ne Metĩndjwÿnh Karõ memã o amirĩt, me kute me kàtàm Metĩndjwÿnh'yr ngjênh kêt kõt mar kadjy. Metĩndjwÿnh nhõ kikrebê kumkati ãm rã'ã nhym me kute kukràdjà tũmjao ba rã'ãri ne me kàtàmja Metĩndjwÿnh'yr ngjênh kêt kumrëx, kumoka'êjamã ngjênh kêt kumrëx. Me kàtàmja kraxje 'yr ngjênh kêt.

⁹ Be, pykabê Metĩndjwÿnh nhõ kikremẽ kõt kukràdjà tũmja ne Kritu kukràdjà djwÿnh'ã amijakre nhym me Kritu kajmã'ã ar o ba. Kukràdjà tũmja ne me ĩ krākàbito mex. Nãm me kukràdjà tũmkõt te Metĩndjwÿnhmã mry bôn kum kungãn te kum kĩnh djà ngãn mã amikam kute axwe mar rã'ã. Me kute kum mry nhõr djwÿnhja te kum mry bôn kum kungãn kadjwÿnhbê mex kêt rã'ã ne. ¹⁰ Kukràdjà tũmkõt ne me me õ kwÿ krën djãmẽ mÿjjao kõm djà'ã memã karõn mekbê uma. Ne kam ajte me kute apÿnh amiku'õnh djàri memã 'ã karõ, me kute kõt amijo bamã. Apÿnh kukràdjà ja ne me ĩ krākàbito mex. Metĩndjwÿnh kute mÿjja kunõ ny kajmã'ã ne memã kukràdjà tũmja'ã karõ nhym me ar o ba.

Kritu kamrõ'ã ujarënh.

Xim k 2.5; Idja 8.6, 12.24

¹¹ Nhym arÿm Kritu bõx ne arÿm kukràdjà ny, kukràdjà mexo kato. Ne kute kukràdjà nyo kator kadjy kubê me kadjy Metĩndjwÿnh mar djwÿnh nhõ bënjadjwÿr rax ne arÿm Metĩndjwÿnh nhürkwã djwÿnhmã wadjà.

Metĩndjwỳnh nhũrkwāti prĩne kute raxo, mexo pykabê ja jakrenh mexjamã wadjà. Mebêngôkre kute ipêx kêt. Me banhõ pykabê mỳjja, pĩ, bõ, bànhõr jao kikre nhipêx kêt.

¹² Be, tãm, Metĩndjwỳnh nhũrkwã djwỳnhbê kumka-timã wadjàn kam amũ kadjwỳnhbê kumoka'ê'ỳr àr pydji. Djã nãm 'ỳr wangij ne akubyn apôx ne 'ỳr ngjênh krãptĩ got? Kati, nãm 'ỳr àr pydji. Djãm mokaak kamrô nàr mryti jabatàn nyre kamrô ne o wadjà, kute Metĩndjwỳnhmã òrmã? Arkati, nãm ta amikamrôo wadjà. Ne o me bapytà. Me bapytàrkumrêx. Gu me batĩn rã'ã rã'ã ne baje o ino rer kêt kadjy.

¹³ Amrêbê kukràdjà tũmkôt ne me mry kamrôo me kamĩ, me akubyn mex kadjy. Nãm me Metĩndjwỳnhkam amikràn kam punu. Nhym kam Metĩndjwỳnh mar djwỳnh mryti djũmre kamrômẽ mokaak kamrôo me kamĩ. Ne mryti jabatàn nyre, kaãnhre bĩn kum adjàn kam prà byn o me punu kaprêprêk. Nhym me kam akubyn mex.

¹⁴ Be, ga mry kamrô kute kàjbê meo mexja pumũ. Bep Kritu kamrô ne mrãmri meo mexkumrêx. Metĩndjwỳnh Karõ tĩn o ino rer kêtja tãm ne Krituo ban o tỳx nhym kam kôt Metĩndjwỳnhmã amingã. Djãm punu ne me kubĩ? Kati, nãm mexo mextire, ajmã kute kêt ne ta Metĩndjwỳnhmã amingãn kam kamrô ajkapĩ. Ta kamrô ne prĩne me bajo mex. Me batyk ne baje Metĩndjwỳnhmã bakre rax ne nĩjar baba kadjy ne gu me bamã bajaxwe kĩnh ne o baba. Nhym kam ta kamrôo prĩne me bakadjwỳnhbê me bajo mex gu me kam arỳm bakadjwỳnhbê bapijàm kêt ne amikam bajaxwe'õ mar kêt ne Metĩndjwỳnhmã badjàpênh ar baba, Metĩndjwỳnh tĩnjamã apê.

¹⁵ Kadjy, Kritu kamrô prĩne kute me bajo mex gu me Metĩndjwỳnhmã badjàpênh kadjy ne Kritu kukràdjà nyo kato. Metĩndjwỳnh kute amiwỳr me bajwỳr ne kute me bamã kabên pydjìn arênh ne kute me bamã mỳjja mex

jarênh gu me 'ÿr babôxmã. Nhyim me banhõ mỳjja mexja dja rã'ã rã'ãn o ino rer kêt-kumrêx. Mrãmri dja Kritu ã memã o ane. Kadjy ne arỳm me axwe pãnh ty. Me kute kukràdjà tùmja ar o bari ne me Metĩndjwỳnhkam axwe nhyim kam arỳm Jeju amityko o pãnh ne.

¹⁶⁻¹⁷ Bir be, nãm tykkôtbit o pãnh. Nhyim kam ajte mỳjja tykkôtbit ne mỳjja amirĩt. Ga me õbikwa tyk kutã kute abenmã õ mỳjja'ã karõja pumũ. Õbikwaja tyk kutã õbikwamã õ mỳjja'ã karõ ne,

—Godja ba ty ga kam inhõ mỳjja jao mõ.

Ne kam kum õ mỳjja nhidji jarênh kum,

—Tãm dja ga o tẽ, ane.

Gêdja kute kum 'ã karõja ty nhyim kam õbikwaja amũ ajte kudjwa ô'ã ar o ba. Me tykkambit ne me ajmãn aben nhõ mỳjja jamỳn mã amũ abendjô'ã o ba. Me tĩn rã'ãkam ne me kute aben nhõ mỳjja jamỳnh kêt. Me tykkambit ne me kute me õ mỳjja kajgo jamỳnh. Bir be, me tykkôtbit ne mỳjja amirĩt. Nhyim kukràdjà tùmjadjwỳ ajte tãm ne.

¹⁸ Nãm me kute kukràdjà tùm kutewaja o bao kurê'ukmã ne Môjdjê mry kamrôo me kamĩ. Mỳjja tyk ne kamrô bikapĩnkôtbit ne mỳjjao mex djã.

¹⁹ Nãm Môjdjê memã Metĩndjwỳnh kabên kukràdjà kunĩ'ã ujarênh kumrêx arẽ. Metĩndjwỳnh kute mekbê mỳjja pymaja memã arênhõ djan memã kunĩ jarênh pan kam mry kamrô by, mryti jabatãnh nyremẽ mokaak kamrô run kam iby ngô run kam pi'ô nhikwỳr ne kad-jat kamrêk jakritare jao krax 'ãpren kam pi'ôja mry kamrômã adjàn kam o me kaprêprêk. Metĩndjwỳnh kabên kukràdjà'ã pi'ók no'ókja kumrêx ne kamĩn kam mebêngôkrejadjwỳ kamĩ. ²⁰ Me kamĩn kam mekmã kum, “Be, Metĩndjwỳnh kute me amã amikukràdjà jarênh mãmđji ga me aje kôt amijo aba kadjy kamrô ne ja. Gora me 'ãno dja”, ane.

²¹ Ne kam ajte Metĩndjwỳnh nhõ kıkre kamĩ. Nãm kapõtã kukràdjàja kumrẽx kamĩn kam kıkre kadjwỳnhbêja'ỳr o wadjàn kam adjwỳnhdjwỳ o kamĩ, kukràdjàja kunĩ kamĩ.

²² Bir be, Mõdjê kukràdjàkõt ne me mry kamrõobit mỳjjao mexo ba. Kamrõ kapĩnkõtbit ne apỳnh me axwe djari Metĩndjwỳnh tu me axweo aknon mar kêtikumrẽx ne.

²³ Bir be, pykabê Metĩndjwỳnh nhõ kıkremẽ õ kıkrekam kukràdjàja ne kàjkwakam mỳjja djwỳnh'ã amijakre. Kam ne Mõdjê mry kamrõobit ã mỳjjao mexo ane. Nhy m bep kàjkwakam mỳjja djwỳ:nh kadjy ne me mỳjja mexbit kum kubĩn kungã. Kàjkwakam mỳjja djwỳnhja kadjy ne me mỳjja mexbit kum kubĩn kungã. Mỳjja mexo kute pykabê mỳjja ja jakrenh. Mỳj ne mex nhy m me Metĩndjwỳnhmã kubĩn kungã? Je kum Jeju. Jejubit ne mexkumrẽx ne kam Metĩndjwỳnhmã amingã nhy m me kubĩ.

²⁴ Djã nãm me Metĩndjwỳnhmã kıkre nhy m kam Křitu kadjwỳnhbê kumoka'êja'ỳr wadjà? Kàjkwakam õ kıkre djwỳnhja'ã kute amijakre djãm kumã ne wadjà? Kati, nãm tu kàjkwamã wadjà. Kum wadjàn arỳm Metĩndjwỳnh kabem djan kum me bajarẽnhõ djan me banêje kukràõ dja.

²⁵ Djã nãm Metĩndjwỳnhmã aminhõr krãptĩ? Kute pykabê Metĩndjwỳnh mar djwỳnh nhõ bẽnjadjwỳr rax kıkremã ngjêx krãptĩja pyrãk? Kum ngore kunĩkõt kute mry kamrõobito mrãnh ne Metĩndjwỳnh nhõ kıkre kadjwỳnhbê kumoka'êmã o ngjêxja pyrãk? ²⁶ Arkati, nãm ren kum aminhõr krãptĩn ren arỳm tokry krãptĩ. Ren pyka nhipêx totokbê ren arỳm apỳnh tokry krãptĩ. Bep kati, arỳm pyka kute o ino rerkam arỳm kator ne kute mekbê axweo apêxmã kute Metĩndjwỳnhmã aminhõr mãmdji.

²⁷ Ga Metĩndjwỳnh kute me kunĩ'ã amim karõja pumũ. Me kunĩ dja me tyk pydji nhy m ijukri dja Metĩndjwỳnh memã axwe pãnh jarẽ.

²⁸ Bir be, nãm ã Kritudjwỳ tyk pydjio ane. Kute Metĩndjwỳnhmã aminhõr nhym me kute bĩn mãmđji. Nãm amijã me krãptĩ jaxwe mẽn kam me pãnh Metĩndjwỳnhmã amingã nhym me kubĩ. Dja ajte me bawỳr kato. Djãm kute axweo pãnhmã? Kati, kute õ me ja pytãr ne kute meo mõrmã. Pykabê me kute abej ajkam amakja pytãr ne ar meo bamã dja ajte kato.

10

Kritu pĩte'ykam tyk pydji.

¹ Bir be, Mõjdjê kukràdjã ne mỳjja mextireja kukãm bõx. Kubê wỳnh kêt. Mỳjja mextire bõx kêttri ne Metĩndjwỳnh Mõjdjê kukràdjãjao kato. Nãm mỳjja mex djwỳnh'ã amijakre kajgo. Kam kute meo mex kêt. Metĩndjwỳnh kute me axweo bingrãnh kadjy ne me kum mry pan kubõn kungã. O anhỹro ba tãmtã: ĩ arek amũ namẽ amex kunĩkõt o anhỹro tẽ. Nãm me te mry pan kamrõ kapĩn te kute o amikam axweo apêx ne mexmã te o amijo ane. Me kute Metĩndjwỳnh'ỳr bikamẽn prãmja ne me te amijaxwe kêt mãm amijo ane. ² Nãm ren me kute Metĩndjwỳnhkõt amijo ba prãmja mry kamrõ ren amikam axweo apêx ne ren mrãmri amikam axwe'õ mar kêt kumrẽx ne ren tu mry par krãta.

³⁻⁴ Nhym bep kati, nãm me te o amijaxweo ane. Mryti djũmre kamrõmẽ mokaak kamrõ mrãmri me kute amijaxweo apêx kêt. Nãm me te o amijo anen mãm axwe. Mry kamrõ kute memã axweo apêx kêt. Nãm tu amex kunĩkõt memã axweo amirĩto tẽ.

⁵⁻⁶ Kam ne Kritu pykamã rwỳk kutã Bãmmã kum,
 “Nã gãm arỳm amã mry kamrõ kapĩnmẽ me kute amã djwỳ nhõrja kĩnh kêt.

Nhym me kute amijaxweo apêx kadjy nàràm kute mry par
 ne rã'ã ngônho kikam rênh ne kute kum angjênh
 ne kute amã ôrja tãm ne ga arým abê kïnh no kati.
 Ne kam aje ijo inhĩmã ijã amim karõ.

⁷ Ba kam amã,

‘Metĩndjwýnh, ota ba dja. Aje amim ijã karõkõt ne ba jãnh
 dja. Amrêbê anhõ pi'ók no'ôkkam aje ijarênhkõt
 ne ba jãnh dja’, ane.”

Nãm ã Kritu Bãmmã ane. ⁸ Nãm kum,

“Mry kamrõ kapĩnmẽ me kute amã djwý nhõrjamẽ me
 kute amim axweo apêx kadjy nàràm mry par ne
 kute ngônho kikam rã'ã rênh ne kute kum angjênh
 ne kute amã ôrja tãm ne ga amã kïnh kêt ne abê
 kïnh no kati”, ane.

Djã nãm me kupa'ã ar o ba? Kati, mrãmri ne Mõjdjê
 memã kõt 'ã karõ nhym me kute kõt ar o ban kute
 Metĩndjwýnhmã mry par ne kute ôro ba. Nhym Kritu
 Bãmmã kum,

“Ga abê kïnh no kati”, ane.

⁹ Nãm kum kabên ja kumrêx jarên kam atãri kum,

“Metĩndjwýnh, ota ba dja. Aje amim ijã karõkõt ne ba jãnh
 dja”, ane.

Bir be, nãm me kute mry par ne kum ôrja arým o
 apêx. Kute pãnh nyjao katormã ne arým tũmjao apêx.

¹⁰ Metĩndjwýnh kute 'ã amim karõkõt ne Jezu Kritu tẽn
 ruwn ta Metĩndjwýnhmã amidjwýnh ngã nhym me kubĩ.
 Nãm kute kum aminhõrkam me bĩn mãmdji. O ne prĩne
 me bajo mex, prĩne me bajo mexo mexkumrêx ne.

¹¹ Me ĩ pýnhkõt me kadjy Metĩndjwýnh mar djwýnh
 aben nhjuk'ã myt kuníkõt ngônho ki kabem ku'ên mry
 kupê. Nãm me kute Metĩndjwýnhmã mry par ne bõr
 ne kum õrmã bõro ku'ê. Nhym akati nhym tãm ne.
 Nhym akati nhym ajte tãm ne. Nãm memã axweo apêx
 kêt kumrêx ne.

¹² Nhyr bep ate ne Kritu Metĩndjwỳnhmã mỳjja pydji ngã. Nãm kum amingã nhyr me bĩn pydji. Nãm amijã me axwe mẽ nhyr me kam bĩn pydji. Nãm me kubĩ nhyr kam tu amijã me axweo apêxkumrêx. Jakôt ne Metĩndjwỳnh djubôk'ãnh nhỹ, kubê bẽnjadjwỳr raxkam ubôk'ãnh nhỹ. ¹³ Ne kam arek kam amako nhỹ. Metĩndjwỳnh kute kurê djwỳnho bikênh mex nhyr me kam umaje kuka kônho terteto ku'ên kam tu mỳrbê rôrôk nhyr kute kwỳ o pardjan kwỳ nhimex, ja ne kam amako nhỹ.

¹⁴ Bir be, kute Metĩndjwỳnhmã aminhõr pydjijakôt arỳm mrãmri tu me'ã mex mẽnhkumrêx nhyr me mrãmri mex rã'ã rã'ã rã'ã. Kute me bajo mex ne kute me bajaxwe kêtoto tẽmja, me bajã ne tu mex mẽnhkumrêx.

¹⁵⁻¹⁶ Nhyr Metĩndjwỳnh Karôdjwỳ kôt arê,

“Bep jakam dja ba memã ikukràdjà ny jarê. Amũ akati 'ôkam dja ba memã ny'ô jarênh mãmdji.

Ba ibê Bẽnjadjwỳr ne ba me amã ikabên ne.

Me ôkre kadjwỳnhbê dja ba ikukràdjajao adjàn kunhõ. Ne me amak krekrekamdjwỳ kunhõ”, ane.

Nãm kabên ja kumrêx jarên kam atãri memã kum,

¹⁷ “Apỳnh me ikam ajaxwe djãri, me aje ikam amikrà ar o abajadjwỳ gêdja ba tu mar krãtan o akno.”

¹⁸ Bir be, mrãmri ne Metĩndjwỳnh arỳm o akno. Kam ne me kute amijaxwe pãnh Metĩndjwỳnhmã mry par ne kum ôrja arỳm apêx. Arỳm kêt. Arỳm Metĩndjwỳnh kute kam me axweja kunõo biknorjakam ajte we amijaxwe pãnh mry par ne ar Metĩndjwỳnhmã ôro ba. Kati, arỳm kêt.

Me kute Kritu mar'ã ukanga kêt mã.

Ep 3.11

¹⁹ Ë, akmere ar, àpnhĩre ar, mrãmri dja gwaj tu bapijàm kêt ne Metĩndjwỳnh nhõ kikre kadjwỳnhbê kumoka'êmã

wangij ne Metĩndjwỳnh 'ỳr bõx ne tu kum amijarẽ. Mỳjkõt dja gwaj bapijàm kêt ne tu 'ỳr wangij? Jejukõt. Gwaj bakadj tyk ne kamrõ bikapĩnkõt dja gwaj bapijàm kêt ne Metĩndjwỳnh'ỳr bõx ne tu kum amijarẽ ne kum bakabẽn.

²⁰ Pykabê Metĩndjwỳnh nhõ kikre kadjwỳnhbê kumoka'ê nêje, Metĩndjwỳnh krĩ djà nêje ne kubêkati wajêt nhym me 'ỳr ngjênh kêtikumrẽx. Nhym bep ajbir Jeju ne me bakadj Metĩndjwỳnh'ã kutan 'ỳr pry ny dji. Pry kubê Jeju. Kute Metĩndjwỳnhmã ta aminhõr nhym me kute bĩn nhym ajte tĩnkõt ne gwaj tu Metĩndjwỳnh'ỳr mrãn bõx ne wangij ne tu kum bakabẽn.

²¹ Be, gwaj banhõ Metĩndjwỳnh mar djwỳnh nhõ bẽnjadjwỳr raxkumrẽx. Nãm prĩne Metĩndjwỳnh nhõ me jao ban meo djuw mex ar o ba.

²² Gora gwaj kam tu Metĩndjwỳnh'ỳr mrãn bõx ne tu kum bakabẽn, on batĩnri 'ỳr mrãn bõx ne kum bakabẽn. Amrêbê ne Mõdjê Metĩndjwỳnh kukràdjækõt kute meo mex kadj mry kamrõ me kamĩ nhym me kam akubyn mex ne. Ne kam ajte me kute amijo mex kadj ngõ mexkambit djuwn o jãm amijã ngrã rẽ. Gwaj baje tu amim Jeju kamnhĩxkam dja gwaj Metĩndjwỳnh kadj bamex. Jeju ne gwaj bajo mex. Ǻ gwaj bamex tanhỳrkam dja gwaj Metĩndjwỳnh'ỳr mrãn bõx ne tu kum bakabẽn, on batĩnri 'ỳr mrãn bõx ne kum bakabẽn. Kwārĩk wãnh gar ajõ anhõkre kadjwỳnhbê amim,

—Djãm Metĩndjwỳnh imã mex? anhỳr kêt. Dja gwaj tu amim kamnhĩxkumrẽx ne katàt bakabẽnkam tu 'ỳr mrãn kum bakabẽn. Pykabê gwaj ar babari dja gwaj Ǻ o ane.

²³ Gora gwaj mã 'ãno dja. Metĩndjwỳnh kute gwaj bamã mỳjja mex jarênh gwaj baje tu amiwỳr kamnhĩxbê ar babaja ne gwaj arỳm memã arẽ nhym me kuma. Gwaj gop mã 'ãno djan gop arek amiwỳr kamnhĩxbê ar baba. Kwārĩk

wānh gwaj 'ā badjukanga kêt. Metĩndjwỳnh ne arỳm gwaj bamā kabēn pydjin arē. Mrāmri ne kabēnkumrēx. 'Ēxnhĩ kêtikumrēx ne kute gwaj bakanga kêtikumrēx. Kam dja gwaj amiwỳr kamnhĩx tỳxbê ar baba.

²⁴ Gora gwaj aben ma ne amidjwỳnhbit mar kêt. Dja gwaj bamā aben jabēmābit abenmā karō ne ajte bamā mỳjja mexbit kĩnh ne baje o baba'ā abenmā karō.

²⁵ Gora gwaj abeno babikprōnh rā'ā. Nhyim bep me kwỳ ne me arỳm kum abeno bikprōnh kanga. Nhyim bep kati, gwaj ba dja gwaj o anhỳr kêtikumrēx. Gwaj ba dja gwaj abenmā tỳx jangij, mā Jejukôt gwaj babikamēnh rā'ā kadjy. Metĩndjwỳnh nhō akati arỳm o rām ne ja. Kam gêdja gwaj mā abenmā tỳx jangjênh ar o baba.

²⁶ Me kute me bamā Metĩndjwỳnh kabēn 'ēxnhĩ kêt jarēnhja ne gu me baje amim marmān ate mā bamā bajaxwebit kĩnh ne, nhỳnh ne mỳjja 'ō ajte me bajaxwe pānh tykmā got gu me bamā bajaxwebit kĩnh ne. Arkati, Jeju pydji ne me bajaxwe pānh ty. Atemā mỳjja 'ō kêtikumrēx. Mỳjja 'ō kute me bajaxwe pānh tyk ne kute me bamā me bajaxweo bingrānh kêt. ²⁷ Nhyim bep ām mỳjja ti, mỳjja punuti, mỳjja pymati: wā pydji ne me jamā nō. Me kum Metĩndjwỳnh kurêjamā ne nō. Memā gêdja axwe pānh jarē ne kam kuwy pōktijamā me kurē. Kumā dja me kurē nhyim me prĩne xêr. Me kajmā'ā ne nō. Kumā dja me kurē. Djām uma ngri? Gora ar amikam ajkam ama.

²⁸ Ē, amrêbê me'ō kute Mōjdjê kukrādjakôt amijo ba kêtja nhyim me'ō axwekôt omũ. Birām me'ō amānhkrut nār kon amānhkrut ne ikjêkêt me'ō jaxwekôt arỳm noo omũn arē nhyim me arỳm pānh kubĩ, kum kaprĩ kêt ne tu kubĩ, axwe pānh.

²⁹ Bir be, kam dja me'ō kute Metĩndjwỳnh kra japrỳkam mrāmri arỳm o bikēnh rax ne. Me kute Mōjdjê kukrādjào bikēnhkam ne me kute tu bĩn kajgomā. Bep me kute

Metĩndjwỳnh krao bikēnhkam dja pānh rax. Pānh raxo pĩne kute Mōjdjē kukràdjàkôt me kute me bĩn kajgoja jakrenh mex ne.

Nām me Metĩndjwỳnh kra japrỳ ne kam ajte Metĩndjwỳnh kukràdjà ny kadjy kamrôjao mỳjja punu, Metĩndjwỳnh kute memã kukràdjà ny jarēnh māmđji kadjy kamrô jao mỳjja punu. Kra ne tyn amikamrô kapĩ gu me kam arỳm Metĩndjwỳnh kukràdjà nykôt amijo baba. Kamrô jao ne me mỳjja punu, o mỳjja kakrit ne kubê kanga. Jeju kute kamrô kapĩnkôt ne Metĩndjwỳnh memã me axweo ajngrà ne meo mex nhym be nām me tu kamrô jao mỳjja kakrit ne kanga.

Ne kam ajte Metĩndjwỳnh Karō japrỳn kum ngryk jadjà. Metĩndjwỳnh Karō me bakam ukapĩja, gu me baje te kam amikrà ar o baba nhym mã me bakam ukapĩ, ja tām ne me aprỳ. Djām ja pānh kêt got? Mrāmri gēđja pĩne Metĩndjwỳnh me jao bikēnh mex ne. ³⁰ Nhỳnh me'ōja kute memã kum,

“Bajbit dja ba memã amijo pānh ne. Ba dja ba me axwe pānh meo ajkē”,

anhỹrja ne gwaj arỳm mar mexkumrēx. Nhym ta ajte memã kum,

“Bēnjadjwỳr djwỳnh ta dja ò me jamã pānh jarē”, ane.

³¹ Metĩndjwỳnh tĩn ne ar ba tām dja pao meo bikēnh mex ne. Kute pao meo pānh ja tām ne uma:kumrēx. Djām mỳjja wã pyma ngri got.

³² Ę, amrêbê Metĩndjwỳnh kute ar ano bōnh totokbê ja gora ar ama. Nām me te ar ajo bikēnh ba gar mã 'ã angrà tỳx ne, ne te atokryn mã 'ã angrà tỳx ne. ³³ Nām me me ipôkri ar ajaprỳn ar akamjêro ba. Nām ã me ar akwỳo ane gar anhitepato ar kuri aku'ên ar omũnho aku'ên kam ar ô'ã akà djàn akapĩn ar omũnho aku'ê. ³⁴ Nhym me ajte ar akwỳbê ijê gar ar ô'ã arerek ne akapĩn ar omũnho aku'ê.

Nhym me te ar anhõ nêkrêxo prõt gar kam mã akĩnh. Mrãmri arým kàjkwakam anhõ mỳjja mextirekõt ajamak bẽn kam tu ate akrã. Kàjkwakam anhõ mỳjja me:xkumrẽx. Mexo kute pykabê ja jakrenh mexi. Tãm gêdja rã'ã rã'ã rã'ã. Nhym me te pykabê mỳjja jao ar ajo ajkê, gar kam kàjmã mỳjja ja man mã akĩnh.

³⁵ Bir be, gora ar amã me uma kêt ne atỳx ne kõt amijo aba rã'ã. Kwãrĩk wãnh gar amã kanga kêt. Mrãmri dja Metĩndjwỳnh pãnh ar amã mỳjja mextire ngã. ³⁶ Dja gar arek akràn mã amijo aba 'ãno dja. Metĩndjwỳnh kute ar ajã amim karõ ne kute ar amã mỳjja jarẽnhja kõt dja gar amijo mõ. Dja gar 'ãno djan akràn mã o amõr rã'ãn arým kõt 'ỳr bõx. Kute me bamã kabẽn pydji jarẽnh ne kute me bamã mỳjja mex jarẽnhja 'ỳr bõx. 'Ỳr bõx ne amim aby. ³⁷ Metĩndjwỳnh kabẽnkam ne krabê Jeju akubyn me bawỳr bõx'ã,

“Adjỳm ngrire, dja ĩ me awỳr tẽn bõx. Amrêbê ne tẽmmã krã ne kam arým amrẽ tẽm 'ỳr. Dja tebê amikrà kêt ne.

³⁸ Me kute amikajmã'ã imar ba arým ije memã axwe kêt jarẽnh nhym me katàt mrãnhja dja me mã imar rã'ãn ar ikõt ba.

Gêdja me'õ me umaje akubyn ibê akêx ba kam arým ibê kĩnh no kati”, ane.

Nãm ã Metĩndjwỳnh ane. ³⁹ Nhym bep gwaj ba ne gwaj baje ã anhỳr kêt kumrẽx. Djãm gwaj bamã me uman baje kubê amijo akêx ne kam tu babiknorkumrẽxmã? Arkati, gwaj ba ne gwaj tu amikajmã'ã markumrẽx nhym arým Metĩndjwỳnh gwaj bapytàn ar gwaj bajo ba.

¹ Ije, mỳjbê ne me kute amikajmã'ã mỳjja mar? Mã ne kute? Bir, me baje amikajmã'ã mỳjja markam ne gu me tu amim kamnhĩxkumrêx ne amiwỳr kam amakbê ar baba. Ne tu amim markumrêx ne banhõkre kadjwỳnhbê amim,

—Nà, mrãmri dja iwỳr bõxkumrêx, ane. Ne kam ajte me baje banoo mỳjja pumũnh kêtka tu amim markumrêx ne banhõkre kadjwỳnhbê amim,

—Nà, mrãmri dja ba ĩ amũ akati 'õkam omũ, ane. Nã gu me ã amikadjwỳnhbê amikajmã'ã mỳjja maro ane. ² Nãm ã amrêbê me bakukãmãre tu amikajmã'ã Metĩndjwỳnh maro ane nhym arỳm mekam kĩnh ne.

³ Nã gu me badjwỳ ã amikajmã'ã Metĩndjwỳnh kute pyka nhipêxkõt maro ane. Nãm kabêno pyka nhipêx nhym kato. Me kute noo mỳjja pumũnh kêtõ ne pyka nhipêx. Nhym arỳm apõx ne amirĩt gu me arỳm kõt omũ. Ne kam amikajmã'ã kute pyka nhipêxkõt kuma, amikajmãtã arênh ma.

⁴ Nãm ã Abeu amikajmã'ã Metĩndjwỳnh maro anen kam õ krit bĩn kugan kum kungã. Nãm kum mỳjja mex ngã. Mexo kute kamybê Kaĩ nhõ mỳjja ja jakrenh. Nhym kam kam kĩnh ne. Ne kum,

—Ga ne ga ajaxwe kêtkaumrêx. Aje imã õrja ne ba imã kĩnhkumrêx, ane.

Be, nãm tu amikajmã'ã Metĩndjwỳnh ma. Amrêbê ne ty. Nãm te tyn mã me bamã mỳjja jarê. Tĩn mãn prãbê mã me bamã arê ne,

—Dja ga me ã ikudjwa amim Metĩndjwỳnh maro ane.

⁵ Nãm ã Enokidjwỳ amikajmã'ã Metĩndjwỳnh maro anen kam tyk kêt. Nãm Metĩndjwỳnh tu tĩn rã'ão wabi. Nhym me te noo abej aprã. Nhym kêtkaumrêx, Metĩndjwỳnh kute tu tĩno àbirkam. Kute o àbir kêttri ne 'ã memã kum,

—Tãmjakam ne ba ikĩnhkumrêx, ane.

Nãm ã Metĩndjwỳnh ane. ⁶ Bir be, nhỳnh ne me'õ amikajmã'ã Metĩndjwỳnh mar kêt nhym we kam kĩnh? Kati, me kute amikajmã'ã Metĩndjwỳnh marbit ne mekam kĩnh ne kum me kĩnh. Godja me'õ Metĩndjwỳnh'ỳr bõx prãm jabej gora amikajmã'ã Metĩndjwỳnh ma. Metĩndjwỳnh ne tĩn ne ar ban kam mekam ukaprĩkumrẽx ar ba, me kute Metĩndjwỳnh mar prãm ne kute abejja mekam ne ukaprĩ. Ja dja me amikajmã'ã kuman kam kõt Metĩndjwỳnh'ỳr bõx.

⁷ Nãm ã Nõwedjwỳ amikajmã'ã Metĩndjwỳnh maro ane. Metĩndjwỳnh ne kum tĩn jadjà. Anhỳr djwỳnhràm kute amirĩt kêttri ne kum ngõ tàm jarẽ. Nhym kam Nõwe umaje kà rax nhipêx ne kam kum prõmẽ kramẽ upãnhmẽ aro wadjàn ar utàn ar aro ba. Nhym ate me kum mã axwe kĩnhja ne me tu ate krãn ar ban kam tu biknorkumrẽx ne. Nhym bep Nõwe pydji ne amikajmã'ã kuma nhym Metĩndjwỳnh arỳm kum axwe kêt jarẽ.

⁸ Nãm ã Abraãodjwỳ amikajmã'ã Metĩndjwỳnh maro ane. Nãm Metĩndjwỳnh atemã kum pyka ny jarẽn 'ỳr ano nhym tẽ. Nãm kum kabẽn pydjìn arẽn kum,

—Dja ba amã kungã ga tu o anhõ pykakumrẽx ne kam kam ar aba, ane.

Nhym kabẽn man kam tu 'ỳr tẽ, kute amikajmã'ã pyka pumũnh kêt 'ỳr ne tu tẽ. ⁹ Nãm tu amikajmã'ã Metĩndjwỳnh ma. Amikajmã'ã kuman pyka nyja kam ar ba. Metĩndjwỳnh kute kum pyka jarẽnh ja kam ar ba. Me bajtem nhõ pykakam ar ba. Nãm mrykào kikrekam ar ba. Krabê Idjakmẽ tàm djwỳbê Djakomẽ ro'ã mrykào kikrekam ar ba. Metĩndjwỳnh kute Idjakmẽ Djako ar adjwỳnh djwỳmã kute pyka jarẽnhjamẽ ro'ã mrykào kikrekam ar ba. ¹⁰ Mỳkam ne Abraão mrykào kikrekambit ar ba? Bir, kỳjrũm Metĩndjwỳnh kute amim krĩ mex'ã karõn kute prĩne ipêxja kamnhĩxbê ne pykabê mrykào

kikre jakam ar ba. Krĩ mex rã'ã rã'ã, krĩ mōr ne tũm ne rôrôk kêt, tãm ne amim kamnhĩxbê ar ban mar ar o ba.

¹¹⁻¹² Nãm ã Xaramẽ mjênbê Abraãodjwỳ amikajmã'ã Metĩndjwỳnh maro ane. Nãm ar te kra prãme ar ba nhym arỳm Xara bêngêxte. Te kubêngêxte nhym kam kra wajêt ne ruw nhym amim kumỳ. Metĩndjwỳnh arỳm kum kabên pydjın arẽn kum kra jarẽ nhym kam Xara amikajmã'ã kuman kam,

—Metĩndjwỳnh ne kabênkumrẽx, ane.

Nhym kam kute kum kra jarẽnhja wajêt ne ruw nhym kumỳ. Te kubêngêxte ne amim kra mỳ. Kam ne Abraão pydji kurũm me kamingrãny apôx ne kumex. Arỳm kubêngêtte kute amikam kô krãn mexo tẽmkam ne kra dji. Nhym amũ aben nhjuk'ã kam tãmdjwỳ aptàn kumex. Tãwã pydji kurũm ne me krãptĩ apôx ne kam kam aptàn kumex ne kute mrãmri kàjkwakam kanhêtire pyræk. Ne kute ngô rax mỳrri pykati ngrà ja pyræk. Pykati ngrà tãm ne me o itun te kute abenã akremã nhym krãpti: anen amũ ajkamẽ nhym me te o ane. Nãm ã kam tãmdjwỳ amũ àptàr ne kumex o ane.

¹³ Ije ar amã ar tũmre jarẽnhja ne ar kunĩ amikajmã'ã Metĩndjwỳnh mar rã'ãn ty. Metĩndjwỳnh kute kabên pỳnho memã mỳjja jarẽnhja, kabên ja jarẽnh ja ne ar kraxje kute amim byr kêt ne ty. Nãm ar kute amybỳm noo omũnhmãn prãbê amikukãm kuman tu amikam kĩnhkumrẽx. Ne memã kum,

—Me bajtemkam ne bar iba. Me õ pyka prokam ne bar iba. Pyka ja ne inhõ pyka djwỳnh kêtumrẽx, ane.

¹⁴ Me ja ne me kute õ pyka jabej rã'ã, kute kàjkwakam õ pyka djwỳnhja jabej rã'ã kam ã kabên ane. ¹⁵ Nãm ren ar õ pyka kurũm kator ja tẽn o aman arỳm ren mã ajte akubyn 'ỳr tẽ. ¹⁶ Nhym bep kati, kàjkwakam ar õ pyka mextire ja ne ar o aman kam 'ỳr tẽn prãmã ne kam ã kabên jarẽnho

ane. Kam ne Metĩndjwỳnh kum ar kĩnhkumrẽx. Nhym ar kute Metĩndjwỳnhmã kum,

—Ar imã akĩnhkumrẽx. Apydji ne ga abê ar itĩn djwỳnh, anhỹrkam djãm kam Metĩndjwỳnh jãm Ar kubê krãmã got, arkam pijammã got. E kum kati, kum ar kĩnh raxkam ne ar kutêp krĩ mex nhipêx ne.

¹⁷⁻¹⁸ Nãm ã Abraão amikajmã'ã Metĩndjwỳnh maro ane. Nãm Metĩndjwỳnh Abraão kute Metĩndjwỳnhkõt ar amijo ba jabej kabin kra'a ku'uw. Nhym bit kute krabê Idjak bĩnmã, kute bĩn ne kum õrmã bit kute bĩnmã. Amrêbê Metĩndjwỳnh kute kum kra pydji jarênh ja ne bit kute kum bĩnmã. Kra ja'ã, kra pydji ja'ã ne Metĩndjwỳnh kute kum, “Akrabê Idjak ja gêdja amũ aben nhijuk'ã kam tãmdjwỳ krãptĩkumrẽx”, anhỹrja.

Kra ja ne Metĩndjwỳnh kum arê nhym kam bit kute bĩn ne kum õrmã. ¹⁹ Nãm õkre kadjwỳnhbê amim,

—Metĩndjwỳnh dja akubyn imã o tĩn, ane. Ne kam bit kute bĩnmã nhym kam Metĩndjwỳnh nêje kukràn akubyn kum nê ne kam mrãmri kute akubyn o tĩn pyræk.

²⁰ Nãm ã Idjakdjwỳ amikajmã'ã Metĩndjwỳnh maro ane. Ne kam krabê Djakomẽ Ixau arkum kĩnh djà jarê, ar kukãm ne arkum kĩnh djà jarê. Ar õ mỳjja kute amirĩt kêtri ne ar kukãm amũ arkum kĩnh djà jarê.

²¹ Nãm ã Djakodjwỳ amikajmã'ã Metĩndjwỳnh maro ane. Nãm amũ krabê Jõdjekam kra amẽ aro kĩnh. Arỳm kubêngête, arỳm bikati mex ne kam mõn amikakêkõt kajpar djà djan kam Metĩndjwỳnhmã rax jarên kam tãmdjwỳjamã kum,

—Gêdja Metĩndjwỳnh ar ajo kĩnh, ane. Nãm ã arkum ane.

²² Nãm ã Jõdjedjwỳ amikajmã'ã Metĩndjwỳnh maro ane. Tyk kutã ne amũ anhỹr djwỳnhrà m mekbê idjaer pykabê Edjitukurũm katormã arê. Ne prĩne memã ta amiji'ã karõ,

me kute 'io mōrmã ne memã 'ã karõ, me kute 'io mōr ne kute õ pyka djwýnhkam adjãrmã, Metĩndjwýnh kute kum pyka jarẽnhjakam kute adjãrmã.

²³ Nãm ã Môjdjê nãmẽ bãmdjwý amikajmã'ã Metĩndjwýnh maro ane. Nãm ar rwýk totokbê o apdju. Bẽnjadjwýr raxbê Parao ne me kra my apõx nhym me kute me parmã arẽ. Nhym arkum bẽnjadjwýr rax kabẽn pyma kêt mex ne tu o apdju, ar kute bĩn kêt ne tu o apdju. Nãm ar kra mextire pumũn kam Metĩndjwýnh kanàrràm tu o apdju. Nhym o bipdjur'ã mytyrwý amãnhkrut ne ikjêkêt nhym kam ar têtêktikam kunhõ.

²⁴ Nãm ã Môjdjêdjwý amikajmã'ã Metĩndjwýnh maro anen kam arým abatành ne kam krõ'ã nãja kanga. Parao kra kute amim prĩrũm mýnhja tãm ne nã kanga. ²⁵ Nãm,

—Kwãrik wãnh ba ijaxwejao amikĩnh kêt. Kwãrik wãnh wãm memã nõ. Godja ba arĩk ar ibaja kwý ngrire ne o amikĩnh? Kati, gêdjãm wãm kunĩ nõ. Ba gêdja ba Metĩndjwýnh nhõ me jakõt itokry, ane. ²⁶ Môjdjê ne Kritu kajmã'ã tokry, Bẽnjadjwýrbê kumkati kajmã'ã tokry. Nhym amũ tũmràm Kritu bõx ne adjwýnhdjwý kõt kudjwa tokry. Nãm me kum kurên aprýn prĩne o ajkê nhym tokry rax ne. Nhym Môjdjêdjwý Kritu kajmã'ã kàjbê ã tokry ane.

Nãm,

—Kwãrik wãnh me kum ikurên wãnh ijapry kwãrik wãnh rã'ã. Ba gêdja ba Bẽnjadjwýrbê kumkati kajmã'ã itokry, nhym bep ate gêdja Edjitukam nêkrêx kumexja wãnh memã nõ. Nhym bep ba dja ba Bẽnjadjwýrbê kumkati kajmã'ã itokry. Tãmbit ne ba imã kĩnh, ajbit ne imã mex, ane. Nãm amũ amikukãm Metĩndjwýnh kute kum pãnh mýjja mextire nhõrmã amikukãm kuman kamnhĩxbê ar ban kam ã o ane.

²⁷ Nãm ã amikajmã'ã Metĩndjwỳnh maro anen kam kum bẽnjadjwỳr rax pyma kêt mex ne pykabê Edjitu kurũm kato. Bẽnjadjwỳr rax te kam ngry:k. Nhym kam kum uma kêt mex ne tu kurũm tẽ. Kute noo anim Metĩndjwỳnh pumũnh pyræk. Metĩndjwỳnh pumũnh kêtja ne kute noo omũnhmãn pràbê akrànmã amijo ba rã'ã ne akubyn akẽx kêtikumrẽx ne.

²⁸ Nãm ã amikajmã'ã Metĩndjwỳnh maro anen kam Metĩndjwỳnh me iròbê mrãnh nhõ akati man kam me kute kamròo kikre'ã ijê djà kamĩnmã memã arẽ. Metĩndjwỳnh kadjy mrãnh djwỳnh kute me imexmã me iròbê mõr ne kute mekbê idjaer kutewa par kêt kadjy. Nãm tu amikajmã'ã kuman kam me kute kamròo kikre 'ã ijê djà djmã memã arẽ nhym me o amiptàro ba.

²⁹ Nãm ã mekbê idjaerdjwỳ amikajmã'ã Metĩndjwỳnh maro anen ngò rax nhidjibê Kamrêk'ỳr bõx nhym tu memã ngò ngrà rê nhym me kam 'ã mõn rê. Mrãmri ne kute atỳxkam pyka ngrà ja pyræk, nhym me kam mõn 'ã rê. Nhym mekbê Edjitu mekòt me kudjwa bit 'ã rêrmã mõ nhym tu ngò meo ajkamuw ne me imex ne.

³⁰ Nãm ã mekbê idjaer amikajmã'ã Metĩndjwỳnh maro anen krĩraxbê Djeriko nêje pyka tỳx nhipòkjamã ipòko dja. Nãm me Metĩndjwỳnh kabẽn man kam kabẽnkòt krĩmã ipòko dja. Nhym akati nhym me ajte tãm ne. Nãm me ã kum ipòko anhỳro dja nhym me'ã akati amãnhkrut ne amãnhkrut ne amãnhkrut ne ikjêkêt nhym arỳm nêje pyka tỳxja te tỳx ne tu ajkaten ròròk ne kumex. Nhym kam 'anh mekbê idjaer kurê djwỳnhja'ỳr wadjàn me'ỳr prõt ne.

³¹ Nãm ã me kuprỳ 'òbê Rabe amikajmã'ã Metĩndjwỳnh maro anen kam amiwỳr mekbê idjaer àpkàro mrãnh djwỳnho wadjàn arkum kabẽn mex jarẽn ar udju ne. Kam ne mekbê idjaer me kute Metĩndjwỳnh kabẽn mar prãm

kêtja kunĩ nhimex ne kam kute Rabe ar bĩn kêt nhym ar ajbit me kuràm tĩn ne.

³² Bir be, djãm arek ar amã me'ã idjujarēnh itēm̃mã? Nàr kon, birãm aje. Dja ba Djidjiãomē Barakimē Xãxãomē Djetemē Dawimē Xamuwemē Metĩndjwỳnh kabēn jarēnh djwỳnhmē me ja kunĩ'ã idjujarēnh tē nhym arỳm ijã akamàt ne.

³³ Nãm me amikajmã'ã Metĩndjwỳnh man kam kurē djwỳnh'ỳr prõt nhym Metĩndjwỳnh memã me kurē djwỳnh rerek mex ne, nhym me mekbê pyka pytà. Nãm me katàt meo ba nhym kam Metĩndjwỳnh kabēn pỳnho memã mỳjja mextire jarē. Nãm me Metĩndjwỳnh kanàrràm kum rop djàkrēbē rijão pyma kêtikumrēx ne. Rop kute krēm̃mã ne me rop nhũrkwākam kumē nhym Metĩndjwỳnh rop jajkwa ajmã o nhym ajkwa pôt ne krēn kêtikumrēx ne.

³⁴ Nãm me Metĩndjwỳnh kanàrràm kum kuwy pyma kêt mex ne. Me kute kuwymã ar rēnh nhym ar xēt kadjy nàràr ne me kuwy pòk jabatànhmã ar kurē nhym Metĩndjwỳnh ar'ã kuwy bĩn ar utà. Nãm me Metĩndjwỳnh kanàrràm ar ba nhym me bit kute pao me imexmã nhym Metĩndjwỳnh me utà. Nãm me Metĩndjwỳnh kanàrràm ar ban katyk mex ne ar ba nhym Metĩndjwỳnh akubyn meo tỳx. Nãm me abenwỳr pròtkam Metĩndjwỳnh kanàrràm ar ban kam amijo aptàn kàjbē kurē djwỳnh rē nhym me bajtemja me umaje prõt. ³⁵ Nhym me niredjwỳ amikajmã'ã Metĩndjwỳnh ma nhym akubyn memã òbikwa kwỳo tĩn.

Nhym be nãm me kwỳ amikajmã'ã Metĩndjwỳnh ma nhym me me kupa. Nãm me te memã kum,

—On me Metĩndjwỳnh kanga ba me me apar kêt. Dja ga me mã 'ã angrà ba kam me prĩne me ajo ajkē, ane. Te memã ane nhym me amibê kanga kêtikumrēx ne 'ãno

dja. Metĩndjwỳnh kute akubyn meo tĩn nhym me õ pyka mextirekam ar bamã ne me kanga kêt-kumrêx nhym me prĩne meo ajkẽn me par punu nhym me tokry:n ty.

³⁶ Nãm me me kwỳ japrỳn me'ã keket ne kam me kaprêprê:k ne prĩne mrykào me kà noxnox nhym kam mrykàkõt me kamrô kukrykry ne. Nãm me me kwỳ djuwpren mekbê ijê djakam me kurê. ³⁷ Nãm me keno me kwỳ titik ne me kupa. Nãm me pĩ kokjêr djào, kàxkakjêro me kwỳ jakàn me kupa. Ne kàxdjwa kajgoo me kwỳ pa. Nhym me amim mrykĩ'átomti, mokaàk kào kubêkàn kayn angij. Me õ mỳjja kêt-kam me õ nêkrêx kêt-kam ne me ar ba. Nhym me prĩne meo ajkẽn nhym me tokryn kaprĩre ne ba. ³⁸ Nãm me kapõt kukritkam ar ba, krãnhrekam ar ba, kẽnkrekam ar ba, pyka krekam ar ba. ãm me mexkumrêx. Pykabê me ja ne me mexo me ja têt kêt-kumrêx ne.

³⁹ Bir be, me ja kunĩ ne me amikajmã'ã Metĩndjwỳnh ma. Nhym kam Metĩndjwỳnh ne me jamã,

—Mrãmri me amexkumrêx. Nã bãm me akam ikĩnhkumrêx, ane.

Nhym bep kraxje me tũmre ja kute byr kêt rã'ã. Metĩndjwỳnh kute kabẽn pỳnho memã mỳjja jarênhja ne me kute amim byr kêt rã'ã. ⁴⁰ Adjỳm, Metĩndjwỳnh ne arỳm me bakadjy amim mỳjja mex'ã karõ. Me bakunĩ kadjy ne prĩne amim mỳjja'ã karõ mextire. Djã nãm kute me tũmrebit pytãrmã? Kati, arỳm ne me bajãdjwỳ amim karõ. Nhym kam mexkumrêx. Mexo kute me tũmre pytãrja jakrenh mexi. Kute me tũmre jamẽ ro'ã kute me bajo mexmã. Gu me batipydjĩn bamexo bamekkumrêxmã ne amim me bajã karõ. Be, tãm ne ja.

12

Metĩndjwỳnh kra kunĩmã uwêk màt.

¹⁻² Be, me kume:xja pumũ. Me kute amikajmã'ã Metĩndjwỳnh marja me tãm ne me krãptĩ. Me tãm ne ne me bamã ipôk ne me banhirãn kumex. Kam dja gwaj me ja kudjwa Jeju 'ãno djan kanga kêt. Ê, mrãmri ne me kute aben rerkam mỳjja kute me kukrà nhym me kute o pôx ne amikôt rênh ne kajkrit ne prôt mex ja pyrãk. Dja gwaj ã mỳjja kute gwaj bakukràja jãm aminêje kunĩ rênho ane. Gwaj bajaxwe kute gwaj bajamỳnh tỳxja jãm aminêje kurên kurên kam arỳm mrãmri bajaxwe kêt kam katàt ar amijo baba mexkumrêx ne. Gora gwaj 'ã badjukanga kêt ne mrãmri katàt amijo tẽn inomã kumẽ. Kute mrãmri ne me kute aben rerkam amikukãm mỳjja pumũnh ne kam kambit no pymjỳr tỳx mex ne atemã mỳjja 'õ pumũnh kêt ne 'ỳr prôtja pyrãk.

Dja gwaj ã o anen amikukãm Jejubit man kôtbit bajamak bẽn ne baje ibej atemã mỳjja 'õ mar kêt ne Jeju'ỳrbit baprôt ane.

Jeju ta ne gwaj bajamak bô gwaj tu amim mar kumrêx. Nhym ajte gwaj bajamak bônho tẽn gwaj arỳm amim mar rax ne. Tãm dja gwaj 'ãno djan kanga kêt ne. Nãm amũ amikukãm kĩnh djà man kam mete pĩte'ykam bĩnja kum uma kêt kumrêx. Djãm me pĩte'ykam arikkam pijàm ngri got. Nãm amikam pijàm mar kêt ne tu ate krãn arek amijo tẽn. Kam ne Metĩndjwỳnh arỳm 'ã bẽnjadjwỳr rax mẽ nhym Metĩndjwỳnh krĩ djàtikam ubôk'ãnh ikô'ã nhỹ.

³ Gora ar amikam Jeju man amikam arek kêt. Me axwe ne me kum kurên prĩne o ajkẽ nhym kam tu arek dja, tu ate krãn dja. Gora ar aman kudjwa arek o tẽn amikam arek ne akapri kêt ne arek kôt o tẽn. ⁴ Djã nã gãm ar Jeju kudjwa akamrô ajkapĩn ty got? Kati, ar ajaxwebê aku'ê tỳxkam kraxje ajô akamrô bikapĩn kêt. Kraxje me kute ar ajô bĩn kêt rã'ã.

⁵ Djām arým ne gar Metĩndjwýnh kabēnja o akno? Arým kute ar ajo kran kam kute ar amā tỳx jadjarmā ja. Djā nā gām ar o akno? Nām ar amā,

“Ē, akmere, gēdja Bēnjadjwýr amā uwěk māt kwārík wānh ga aprý kêt ne kam amikati kêt. Gēdja amā bēn tỳx ga akaprī kêt. Mýkam?”

⁶ Bir, kum me abējamā ne uwěk māt. Ne kute meo krajadjwý kunīmā uwěk māt ne, me katāt mrānh kadjy”, ane.

⁷ Bir be, Metĩndjwýnh kute ar amā uwěk māt kam dja gar tu arek dja. Kôt ne Metĩndjwýnh kute ar ajo kra. Nhýnh ne me prīre 'õ bām kute kum uwěk māt kêt? ⁸ Bir be, Metĩndjwýnhdjwý kute kra kunīmā uwěk mātja pumū. Me katāt mrānh kadjy ne kramā uwěk māt. Mýj me ne Metĩndjwýnh memā uwěk māt? Kute me bajo kra djwýnhja. Nām ren kute gajbit amā uwěk māt kêt ga ren abē kra djwýnh kêt kumrēx ne ren kam abē krô'ā me kute adjir pyrāk.

⁹ Ga me babām bēngôkre kute me bamā uwěk māt gu me bapijām djaje banhibôn bakrīn amikam baje kabēn maro bakrīja pumū. Bir be, gwaj pykabê gwaj babāmja kurām kàjkwakam Babāmja kabēn maro nhý, gwaj badjumar mex ne ar baba kadjy, amikam kabēn maro nhý. ¹⁰ Pykabê gwaj babām bēngôkre kute gwaj baprīrerūm gwaj bamā uwěk māt. Me ta kute amimarkôt ne gwaj bamā uwěk māt ne. Nhym bep Metĩndjwýnh ne gwaj bamex kadjybit gwaj bamā uwěk māt ne. Ta mexo mexkumrēx kôt gwaj bamex kadjy.

¹¹ Djām me kute memā uwěk māt kam tokry ngri got. Kam ne me tokry:n kam kaprīre ne. Nhym bep amū atūmā gēdja arým umar mex ne katāt mrā. Arým kute mar ne kôt amijo tēm kam gēdja umar mex ne katāt mrā.

¹² Bir be, kam dja gar on ajte amikam atỳx ne arek kôt amijo tẽ. Kute mrãmri ne me kr'ỳr mrãnh ne katyk me:x ne mrãnh ne kõno birênh mrãnh ne kute krío rãm ne jao mrãnh ne arỳm ajte ìmẽ ikra àdjõnh ne arỳm ajte mrãnh tỳx ne arỳm arek mrãnh ja pyràk. Dja gar ã amikam atỳx ne arek kôt amijo atẽm o ane. ¹³ Nà, dja gar kôt amijo tẽn katàt amiprywã djin arek 'ã mõ, katàt ar abenkôt amrãnh kadjy. Gar aje Jeju mar tũmwã arek me kute amim Jeju mar rerekwãmã mõn amõr mexo mõ gẽ me arek ar akõt mõ. Ar akõt mõn 'õ abenbê màt kêt. Me kute amim Jeju mar rerek ne me kute mrãmri ne me mex mã ba nhym me par tãtãk mekõt 'ok ba pyràk. Gẽdja kute mar rerekrewã ar akõt tẽm rerekre ne tẽ:n kam arỳm amũ tẽm tỳx ne arỳm amũ mrãnh mex, arỳm Jeju mar tỳx ne.

Me kute axwebê amijãno ãmmã.

¹⁴ Gora ar amũ me wã kunĩmã akabẽn mexbit jarẽn angryk kêt, gar kam adjumar mex ne ar aba. Gora ar Metĩndjwỳnh mexo amexkumrẽx. Kam dja gar Metĩndjwỳnh pumũ. Dja gar Metĩndjwỳnh mexo amex kêt ne Bẽnjadjwỳr'ỳr abõx ne omũnh kêtikumrẽx ne.

¹⁵ Ë, Metĩndjwỳnh ne ukaprĩkõt me utà. Gora ar amijãno dja, ar ajõ Metĩndjwỳnh djukaprĩjabê jãm akrãn 'ỳr abõx kêt karõ. Gora ar amijãno dja. Dja gar ajõ ajaxwemo krax ne kam aje mỳjja djỳ pyràk, aje akrõre djỳ pyràk. Kute mrãmri ne me kute akrõo tep ka'õnh nhym kute prĩne ngõ jaër ne kute tep nhimexo ba ja pyràk. Gora ar amijãno dja. Dja me'õ axwemo krax ne kam amikõt me akrãptĩmã axwe jangij. Gora ar amijãno dja.

¹⁶⁻¹⁷ Ne ajte ar ajõ aprõ prãm karõ nhym me niredjwỳ 'õ mjên prãm karõ gora ar amijãno dja. Kwãrik wãnh ar ajõ abê Ixau kêt. Gora ar amijãno dja. Ixau ne pykabê mỳjja kakritjabit kum kĩnh ne kam kỳjrũm mỳjja mextire ja kum

kĩnh kêt kumrêx. Ixau ne kutewa nhym kam kôt bãm kute Metĩndjwỳnhmã kum,

—Dja ga o rax ne o kĩnh, anhỳr kadjy nàràm kute kum ò nêkrêx kunĩ rer kadjy nàràm bit 'ã no tỳx.

Nhym Ixau kute àkurbit mar ne kam kamyjamã ò kwỳ krên djà pydji pãnh mỳjja kunĩ kanga. Nhym kam tũmràm kum kĩnh ne kam te 'ã o ane. Nhym bãmja nê ne. Nhym amim ngryk ne te mỳrkam 'ã bãm o ane. Nhym tu ate krã. Ja ne gar arỳm ama. Gora ar amijãno dja.

¹⁸ Ë, ate ne Metĩndjwỳnh amrêbê me bakukãmãremã kukràdjà tũmjao kato nhym bep ate ne ajbir me aga akamingrãnydjwỳmã kukràdjà nyo kato.

Amrêbê ne me bakukãmãre krãnhbê Xinaj'ỳr môn bôx. Nhym pô:ko nhỹ nhym kũm kakrãtyk ne kum ipôk nhym kam kam akamàt kô ty:k ne. Nhym nadjwỳ kam krar ne adjênho dja. ¹⁹ Nhym potidjwỳ kakôr tỳx ne, nhym Metĩndjwỳnhdjwỳ òkreti:rekam kabên. Nhym me kuman kam umaje amra:n kum,

—Kwãrĩk wãnh ga ajte me imã akabên kêt, ane. ²⁰ Nhym Metĩndjwỳnh arỳm memã,

“Kwãrĩk wãnh me krãnh kupênh kêt. Dja ga me abêngôkre 'õ nàr mry 'õ krãnhreja kupê ga me arỳm kêno titik ne abĩ”, ane.

Nhym me kuman kam umaje àmrao kumex. Te ku'ê tỳxmã. ²¹ Nhym Mòjdjêdjwỳ omũn kam,

“Ije kum bep imã uma. Nã bãm umaje itertet ne”, ane.

Djãm uma ngri: got. Nãm ã pykabê Metĩndjwỳnh nhõ krãnh ane. 'Ỳr ne me bakukãmãre bôx.

²² Nhym bep ajbir ne Metĩndjwỳnh me akamingrãnymã kukràdjà nyo kato ga kam ar krãnhbê Xijão, Metĩndjwỳnh nhõ pyka'ỳr môn bôx. Kàjkwakam ò pykabê Djeruxarê'ỳr bôx. Kam ne Metĩndjwỳnh tĩn ne ar ba, nhym kadjy mrãnh djwỳnhdjwỳ kamã ar ba. Kadjy mrãnh djwỳnh

kräpti:. Me'ã akre kubê 1.000.000 kräpti:. Nãm me'ã akre kute pi'ô pyrãk ne kĩnh tire ne kute Metĩndjwỳnhmã rax jarẽnhmã ar aben pydjin ba.

²³ Kamãdjwỳ ne Metĩndjwỳnh nhõ me ja kunĩ aben pydji. Metĩndjwỳnh nhõ me ja kumrẽx kute amikajmã'ã marja ne me aben pydji. Amrẽbê kute kàjkwakam pi'ôk no'ôkkam me diji janhôrja tãm ne arỳm kamã 'ã aben pydji. 'Yr ne gar bõx. Bẽnjadjwỳr rax kute me kunĩmã pãnh jarẽnh djwỳnh kubê ne Metĩndjwỳnh, 'yr ne ga me bõx. Ne ajte me karõ, me pykakam ar bari katàt mrãnh nhym Metĩndjwỳnh kute me'ã mex rẽnh, me ja karõ'yr ne gar bõx.

²⁴ Be, Jeju'yr ne gar bõx. Jeju kute me bamã kukràdjà ny jarẽnh mãm dji ne kute o kator, ne kute ta kamrõ bikapĩnkõt me bajo mex, 'yr ne gar bõx. Jeju kamrõ kute mexo Abeu kamrõ jakrenh mexi. Amrẽbê ne me bakukãmãrẽbê Abeu tyn kamrõ ajkapĩ nhym me omũn kam pãnhbit jarẽ,

—Gora gê on o pãnh, ane.

Nhym bep me kute Jeju kamrõ markam ne me,

—Metĩndjwỳnh ne Jeju kamrõkõt tu me bajaxweo akno, ane.

Be, Jeju mextire'yr ne gar bõx.

²⁵ Bir be, kam ne ba ar amã,

—Gora ar amijãno dja gê Metĩndjwỳnh ar amã kabẽno dja. Kwãrĩk wãnh ar ajõ kabẽnbê jãm akrã kêt. Gora ar ama.

Ë, amrẽbê Mõjdjê kute pykabê memã kabẽn jarẽnhkam me'õ kabẽnbê jãm krãn ar ba djãm kute kum o pãnh kêt mã? Kati, Metĩndjwỳnh ne prĩne memã o pãnh. Nhym bep ajbir ne Metĩndjwỳnh kàjkwa kurũm me bamã kabẽn jarẽ. Nhym mexo amrẽbê pykabê kabẽn ja jakrenh mex ne. Be djãm gwaj badjwỳ kabẽnbê jãm bakrã djãm kute

gwaj bamãdjwỳ o pãnh kêt mã? Arkati, dja pñne gwaj bamãdjwỳ o pãnh. Me kute Metĩndjwỳnh kabẽn marbê jãm krãja gêdja meo bikẽn h mex ne, ne kam me kute Mõdjê kabẽn marbê jãm krã ja pãnh akrenh mex ne.

²⁶ Amrêbê ne kabẽno pykabit karng rõr kajgo nhym tertet. Nhym bep ajbir ne kabẽn pydjĩn arẽn memã, “Djãm pykabit ne ba ije karng rõrmã? Dja ba ĩ ajte kãjkwadjwỳ karng rõ”, ane.

²⁷ Be, kute “Dja ba ajte” anhỹrja ma. Metĩndjwỳnh kute mỳjja kunĩ nhĩpêx ja gêdja ajte karng rõ nhym tu apõx ne rõrõk ne kunĩ akuno. Nhym bep mỳjja jarij tỳxjabit dja arek arij. Tãm ne rõrõk prãm kêt kumrêx.

²⁸ Be, Metĩndjwỳnh nhõ mỳjja dja rõrõk prãm kêt kumrêx. Metĩndjwỳnh kute õ pykakam ar me bajo baja gêdja tỳm prãm kêt kumrêx ne arek gwaj bamã nõr rã'ã rã'ã ne. Tãm ne me bamã arê gwaj tu 'yr babõxkumrêx. Kadjy, Metĩndjwỳnh kute õ pykakam ar me bajo baja tỳm prãm kêt tãm ne gwaj bamã nõr rã'ã, kadjy dja gwaj bakĩnhkumrêx ne ar baban kum amikĩnh jarê. Kum amikĩnh jarẽn kum rax jarẽn kam kum badjãpênh mextire gê gwaj bakam kĩnhkumrêx. Gora gwaj kam bapijãm ne bamã uma. ²⁹ Djãm uma ngri got. Dja pñne meo apêx. Kute mrãmri ne kuwy põkti kute pñne mỳjja bõr ne o apêx ja pyrãk. Dja ã Metĩndjwỳnh meo apêxo ane.

13

Kute memã 'ã karõo ino rer.

Kor 1.10; Tex k 4.1; Ped k 2.11

¹ Gora ar abeno akamyn mã amã aben jabê rã'ã. ² Gora ar me bajtemwã man anhũrkwãmã amiwỳr meo wangjê ne mekam adjukapřĩ. Nãm me kwỳ ã anen aminhũrkwãmã kadjy mrãnh djwỳnh kwỳo wangij ne o djuw mex. Kute kraxkõt mar kêt ne tu o djuw mex. ³ Ě, gora ar

mekbê ijê djâkam ar ku'êja ma. Dja gar gadjwÿ aje ar ro'ã mekbê ijê djâkam aku'ê mãn prabê ar ô'ã atokryn akà djàn akaprîn ar aba. Kwãrîk wãnh gar ate akrã kêt. Dja gar ã arkôt ane. Me kute prîne aro bikênh nhym ar tokryjadjwÿ gora ar ar ama. Dja gar ar ô'ã akà djàn atokry ne. Be, tãm ne ja. Gêdja ba ajte ar amã mÿjja 'ôdjwÿ jarê.

⁴ Me abenwÿr bakam ne mrãmri mÿjja mexkumrêx. Dja gar aprõ'ÿr aban kam aprõ djwÿ:nh'ÿrbit mrã. Nhym me niredjwÿ mjên djwÿnhbit ma. Me kwÿ ne me me prõ prokam no kêt ne. Nhym bep ar ga. Ar ga dja gar akunî me prõ prokam apijàm ne aprõ pÿnh ne. Kwãrîk wãnh ga ar krô'ã aprõ kêt, gê me nija krô'ã mjên kêt. Me prõ prãm, me mjên prãmja dja Metîndjwÿnh memã pãnh jarê. Me kute me'ôbê prõ nâr mjêno àkînh jamãdjwÿ pãnh jarê.

⁵ Kwãrîk wãnh gar pi'ôk kaprî prãmebit ar aba kêt. Dja te ar anhõ mÿjja ngrire gar tu o amikînh. Mÿkam? Bir, Metîndjwÿnh ta dja ar ajo djuw mex. Arÿm ne ar amã, “Dja ba me akurũm itêm kêt kumrêx.

Dja ba me akanga kêt kumrêx.

Dja ba me ajo iba rã'ã rã'ã ne”, ane.

Ga Metîndjwÿnh kute ar gwaj bajo ba rã'ãja pumũ. ⁶ Bir be, kam dja gwaj batÿx ne banhõkre kadjwÿnhbê amim, “Metîndjwÿnh ta ne kute ijo ba djwÿnh.

Kam dja ba itîn prãm kêt.

Mã ne me kute ijomã”? ane.

Dja gwaj ã amim ane.

⁷ Ê, gora ar kute ar ajo ba djwÿnh ma, ar kute ar amã Metîndjwÿnh kabên jarênhja dja gar ama. Ar kute kôt amijo ba mex rã'ãn ar ty. Ga ar kute amikajmã'ã Jeju mar ne 'ã ngrà tÿx ja pumũ. Ar ta ne ar arÿm ty. Ar ja dja gar amikam ar aman kam ar'ã amijakren ar aba. ⁸ Nà, nãm ar amikajmã'ã Jeju ma. Jeju Kritu pydji. Atemã kêt. Amrêbê tãmÿ ne ajbir ajte tãm ne. Tãm gêdja rã'ã rã'ã rã'ã

ne. ⁹ Kwārīk wānh me kute apŷnh mỳjja'ã ujarēnh nyo ar anoo biknor ar o baja kwārīk wānh o ar anoo biknor kêt. Metīndjwŷnh ta ne ukaprīkôt gwaj bajo tỳx gwaj katāt mrā. Kam ne mexkumrēx. Bep ate ne me ta kukrādjakôt mekbê me àkur djà pyma. Kam ne punure. Nām me te o anen arīk ar ba.

¹⁰ Ate ne me bakukrādjà ny. Kritu ta ne Bāmmā me bakadjy amingā nhym me kubī. Nhym me bajaxwe pānh ty. Nhym bep me kute kukrādjà tūm ar o ba rā'āja, me Metīndjwŷnh nhō kikrekam àpēnh ja kute Jeju me bamā tykja mar kêtukumrēx, ne Jeju nhō kukrādjà nyja mar kêtukumrēx. Nhym Metīndjwŷnh kute me ja jaxweo biknor kêt ne kute meo kra kêtukumrēx.

¹¹ Kukrādjà tūmkôt ne me kadjy Metīndjwŷnh mar djwŷnh nhō bēnjadjwŷr rax mry pan kamrôo atom ne o tē. Metīndjwŷnh nhō kikre kadjwŷnhbê kumoka'êmā o tēn o wadjà. Me axwe pānh ne kum kungā. Metīndjwŷnh kute omūnh ne me axwekam ngryk kêt kadjy. Nhym bep mry nhīja ne me atykmā kum angij nhym prīne xēr. ¹² Kôt ne Jeju atykmā tokryn ã tyk ane. Ta kamrôo kute prīne me bajo mex kadjy. ¹³ Kam dja gwaj atykmā jêt djàja'ỳr tē. Kôt gwaj batokry nhym me kute kôt gwaj bajapry gwaj kudjwa bapijammā.

¹⁴ Djām pyka jakam ne gwaj banhō pyka? Kati, nhym bep amrē mōr rīnā ne gwaj kam ama nhym rā'ã rā'ã rā'āmā. Kam dja me gwaj bajapry gwaj ate bakrā. Kwārīk wānh rā'ã. Mrāmri dja tu ã ane. Kỳjrūm ne gwaj banhō pykakumrēx, gwaj banhō krīrax djwŷnh. ¹⁵ Bir be, gwaj banhō pyka gwaj bamā nōr nījkam amakbê mā Metīndjwŷnhmā mex jarēnh rā'ã ne. Gwaj baje amikajmā'ã Jeju markam dja gwaj ã Metīndjwŷnhmā anhŷr ar baba rā'ã ne. Gwaj baje Metīndjwŷnho aminhōn baje idji jarēnh ar o babaja dja gwaj ò ane. Kam dja Metīndjwŷnh

gwaj bakam kīnhkumrēx nhym kam mrāmri kute amrēbê mete Metīndjwýnhmā mry par ne kum ōr nhym mekam kīnhkumrēx ja pyrāk.

¹⁶Gora ar abenkam adjukaprīn aben man ar abeno aban anhōdjānhkōt abenmā mýjja ngā. Gora ar mā aman 'āno dja. Gēdja gar ane nhym arým ar akam kīnh. Kute amrēbê mete mry par ne kum ōr nhym mekam kīnh ja pyrāk.

¹⁷Ar kute Metīndjwýnhkōt ar ajo ba djwýnhja gop ar kabēnkōt amijo aba. Dja ar ar amā mýjja'ō jarē gar tu abēn kēt ne akrānmā kōt aba. Nām ar prīne Metīndjwýnh kabēno ar ajo djuw mex ne ar ajā ukanga kētkumrēx. Mýkam dja gar arkōt amijo aba? Bir, Metīndjwýnh kute ar kukjēr nhym ar kute kum amikōt amijarēnhmā. Kam dja gar arkōt amijo aba nhym kam ar kīnhkumrēx ne. Ar kīnhkumrēx ne amikōt kum amijarē. Dja gar ā aro anhýr kēt nhym kam ar kum amijarēnhkam kaprīre ne. Gar gadjwý axwe amikam adjumar. Be, tām ne ja.

¹⁸Gop ar Metīndjwýnhmā ar ijarēnh rā'ā. Ar ije amikam ijaxwe 'ō mar kēt ne ije kōt amijo iba prāmā, Jeju kute imā kukrādja jarēnh kunīkōt ije amijo iba prām kam gēdja gar kum ar ijarēnh 'āno dja. ¹⁹Gora ar on kum ar ijo a'wý. Dja gar kum ar ijo a'wý bar amikrà kēt ne on arým wām ar awýr bōx.

²⁰⁻²¹Gē Metīndjwýnh ar amā mex jangjē ga kam ar apýnh mýjja mex djāri kunīo amiptān ar o aba. Metīndjwýnh kute memā umar mex jarēnh djwýnh ta gēdja ar amā o ane. Gar kam kabēnkōt akabēn ne kōt ar amijo aba. Kute ar ajā amim karōkōt ar amijo aba. Metīndjwýnh gēdja ar angrēk gar kōt amijo aba mextire. Nhym kam ar akam kīnhkumrēx. Jeju Kritu ta gēdja ar ajo tỳx gar kōt amijo aba. Tām ne kubē me bapumūnh djwýnhbê kumkati. Metīndjwýnh ne me tyk kurūm akubyn Bēnjadjwýr Jejuo tīn ne o kato. Nhym

kam kubê me bapumũnh djwýnhbê kumkatikam pñe me bapumũnh 'ãno dja. Mrãmri ne kute mrykĩ'ãtomti pumũnh djwýnh kute pñe amim o djuw mexkôt kute omũnh ja pyræk. Nãm ã me bajo mrykĩ'ãtomtin pñe me bajo djuw mexo ãmo ane. Mýjkôt ne kubê me bapumũnh djwýnhbê kumkati ne raxo kute me omũnh djwýnh kunĩ jakrenh? Bir, kute Metĩndjwýnhmã aminhør nhym me kute bĩn nhym kamrô bikapĩnkôt. Be, kamrô bikapĩnkôt ne ajte me bamã kukràdjà ny jarēnh mãmđji ne o kato. Jeju nhõ kukràdjà nyja dja rã'ã rã'ã rã'ã ne. Ë, gora gê me Kritumã kum kubê kumkatiti:, umati, mexo tuknĩ jarēnh rã'ã rã'ã rã'ã ne. Tãm ne ja.

²² Ë, akmere ar, àpnhĩre ar, gora ar pi'òk no'òkkam ikabēn ja ma. Tu akrànãmã maro tēn inomã amē. Ije pi'òk no'òko ar amã tỳx jangjēnh kadjy ne ba ar amã pi'òk no'òk ne. Ije ar amã pi'òk no'òk krānne.

²³ Ë, ba ar amã arē gar ama. Nãm me gwaj bakamy Ximoxi mekbê ijē djārũm kaba nhym amrē tēmãm. Gēđja on bõx jabej bar iro'ã wãm tēn bõx ne ar apumũ.

²⁴ Nã bãm ar akunĩo ama ne. Gora ar ar kute ar ajo ba djwýnhwãmã ar ijarē. Ne Metĩndjwýnh nhõ me mextire wãmãđjwỳ ar ijarē. Nhym pykabê Itarijkam me kute Jejukôt abeno kamyja ne me ar ajo ama:n ar amã amijarē.

²⁵ Gê Metĩndjwýnh ukapĩkôt ar akunĩo djuw mex. Tãm ne ja.

Metĩndjwỳnh Kute Memã Kabẽn Ny Jarẽnh New Testament in Kayapó (BR:txu:Kayapó)

copyright © 2012 Wycliffe Bible Translators, Inc.

Language: Kayapó

Translation by: Wycliffe Bible Translators, Inc.

Kayapó [txu], Brazil

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Kayapó

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-27
